

# Peo Ha Se Mojalefa

## Hammoho Le Lekgapetla



A re tswe re sa eme bakeng sa motsotso wa thapelo. A re inamiseng dihlooho tsa rona.

2 Modimo o Ratehang, re hloma e le monyetla o moholo wona, bosiung bona, ho ba mona lebakeng lena, ho tlisetsa lefatshe le shwang le moloko o shwang Kreste ya phelang.

3 Re tla kopa, Morena, hore O tle o tlotse Mantswe a rona le dithohothelo tsa rona, di tle di se kgutlele ho Wena di le feela, empa di ke di phethe tseo di di reretsweng.

4 Thusa monna e mong le e mong, mosadi, moshanyana, kapa ngwanana, mona bosiung bona, ya hlokang. Mme, Ntate, re a tseba hore bohole re a hloka. Mme ha re tloha, bosiung bona, re tle re ikutlwé dipelong tsa rona jwalo ka bao ba tswang Emmause, ka mora...ba pake tsoho ya Kreste, ba re, "Dipelo tsa rona di ne di sa tjhese ke'ng ka ho rona ha A ntse bua le rona tseleng?" Fana ka sena, Morena.

5 Fodisa ba kulang le ba hlokofetseng. Ho se be le a le mong ya fokolang hara rona ka mora tshebeletso ya bosiu bona. Mme hodima dintho tsohle, ho se be le moetsadibe ya setseng, Morena. Bohle ba ke ba dumele Bophelong bo sa Feleng, ka hobane e le morero wa rona wa ho bokana mona.

6 Mahlohonolo ana ao re a kopa tlotlisong ya Mmuso wa Modimo, ka Lebitso la Jesu Kreste, Mora Modimo. Amen.

Le ka dula fatshe.

7 Ho hotle, bosiung bona, ho kgutlela mona hape. Mme kea bona re na le ba mmalwa ba emeng ka nqa tsohle, mme ke nahana me—mehala e buletswe jwale, ho ya metseng e mengata e fapaneng ho phatlalla le setjhaba; San Francisco, Tucson, hodimo kwana botjhabela. Mme rona, ka mohala, re isa ditumedisó ho bona. Re ka hara odotoriamo mona bosiung bona. Mme odotoriamo e kgolo e petetsane, le pakeng tsa ditulo; le ka nqa tsohle maboteng, ho tletse batho ba emeng. Mme re a utlwisia hore hosane bosiu re tla leka ho bula lehlakore le leng mona, ho ya jimating, mme re fumane odotoriamo e kgolwanyane e tla hlokomela mohlomong batho ba dikete tse mmalwa hape. Ka baka leo re tshepa jwalo, hosane bosiu. Ha eba e tletse bosiung bona, bosiu ba pele, kgele, re dumela e tla ba kgolwanyane hosane bosiu. Mme kea bona ba kentse ditulo tse tlatseletsang, le ntho e nngwe le e nngwe, hape, bosiung bona.

<sup>8</sup> Re dutse tlasa ditebello tse kgolo; pele, ho Tla ha Morena Jesu, ntho e latelang, pholoso ya...ho meya e lahlehileng e tla Mo amohela bosiung bona le ho itokisetsa ho Tla ha Hae mohla A hlahang.

<sup>9</sup> Ke batla ho hlahisa tumediso e ikgethileng le kamohelo ho banna bana bohole ba kgabane ba dutseng kalaneng, etswe ke utlwisia hore bongata ba bona ke baruti. Hlotshwana sa lekgolo, kapa ho feta, se dutseng kalaneng, mme ruri re leboha ha ba le teng mona.

<sup>10</sup> Ho lona batho bohole, moo le ka bang teng feela, dikarolong tse fapaneng tsa setjhaba... Mme ke utlwisia ha ba bang ba le teng mona ho tswa mose, mose ho mawatle. Ka hona re leboha haholo ha le le teng mona ho thabela setswalla sena mmoho le rona, etswe re dutse tlasa ditebello tsa hore Modimo o tla re abela kgabareng ya kopano ena.

<sup>11</sup> E ka, esale ke nahanne ho kgutlela dikopanong tsena tsa matsatsi a mmalwa, pelo ya ka e hlabetswe mokgosi ka mokgwao makatsang ka maikutlo a maholo a hore ntho e nngwe e mothating wa ho etsahala. Ha ke tsebe feela hore ke eng, empa ke tshepa ha e le tshenolo e kgolo ho tswa ho Modimo, e tla—e tla re hlophisa le ho re etsa baahi ba batle ho feta ba Mmuso wa Hae re sa tsamaya lefatsheng le lefifi lena la sebe le ho se dumele.

<sup>12</sup> Setsha sena bosiung bona, nqalo yona ena, se ntshwaretse ntho e kgolo. Ho tloha ke tsebile hore ba hahile odotoriamo ena mona, e sa le ke batlile ho tshwara tshebeletso sebakeng sena. Ke leboha lekgotla la sekolo haholo le bao ba re dumletseng ho e fumana ka mohau.

E ne e le setsheng sena, mohlomong hantle moo mohaho wona o emeng teng bosiung bona, moo ntho e kgolo e ileng ya etsahala dilemong tse ka bang mashome a mararo tse fetileng, hantle feela mobung oona ona. E se letho haese tshimo ya brumseje mohlang oo. Mme ke ne ke dula tlung e nyenyane mose wane ho mona, dijareteng tse ka bang makgolo a mabedi. Ke ne ke kgathatsehile haholo matsatsing ao ka pholoso ya ntate le mme. Etswe, bobedi bo iketse bosiung bona. Mme haholoholo, tsatsing leo, ke ne ke kgathatsehile ka baka la ntate wa ka. Ke a hopola, ke ne ke robetse mathuleng. Ho ne ho futhumetse, lehlabula.

<sup>13</sup> Taba ena e ngotswe, kea kgolwa, bukeng e nyenyane e bitswang *Jesu Kreste Yena Maobane, Kajeno, Le Ka Ho Sa Feleng*, kapa ho seng jwalo e ne e le bukaneng e bitswang *Ha Ke A Ka Ka Hana Pono Ya Lehodimo*.

<sup>14</sup> Mme yare ke sa robetse mathuleng, hang ka phaphama, mme morwalo wa fihlela pelo yaka bakeng sa ntate wa ka. Jwalo ka ha, batho ba bangata ba motse mona ba tsebile ntate wa ka. Ke nahana hore e ne e le monna ya phahameng, leha e

ne e le moetsadibe. Mme, empa a e-na le tlwaelo e mpe, moo ke lekileng ho lwantshwa ntho eo ka matla kamoo ke ne nka kgona, mongwaheng jwalo, hoo ke, ho nwa. Mme bosiumg boo o na ntsa nwa. Mme ka phaphama morwalo o moholo o dutse pelong yaka bakeng sa hae. Mme ke ne ke apere dipijama tsa ka feela, ka kgohletsa marikgwae a ka, ke setse ka hempe yaka ya pijama; mme ka phaila hara tshimo ena ya brumseje, ho ya fihla moo mohlomong ntho ena e emeng teng jwale, mme ka kgumama fatshe ho rapella ntate wa ka.

<sup>15</sup> Mme ha ke ntse ke rapela mme ke kopa Modimo ho mo pholosa le ho se—ho se mo dumelle ho shwa e le moetsadibe, hore ke ne ke mo rata; mme yare ke sa le thapelong, ka tsoha ho sheba hodimo nqa botjhabela ho tswa mona, mme pono ya hlaha. Mme ka hodingwana ho nna, bongata ba lona le tseba pono eo, ho ne ho eme Morena Jesu.

<sup>16</sup> Jwale, ha ke lometswe ke dithetsa-mahlo, kamoo ke tsebang. Empa dipono ke nnete. Mme Morena Jesu o na eme mono, kgetlo la pele nkileng ka Mmona ponong ya mofuta oo. A ka ba, oh, maoto a ka bang leshome ka hodima hlooho ya ka, a eme sebakeng, ka leoto le le leng feela le nkang kgato. A apere seaparo se sesweu, ditsiba di ithatika mosehong wa sona. A e na le moriri o theohelang mahetleng a Hae. A shebahala e ka ba, Monna eo Bibebe e reng E e ne e le yena, a ka ba mashome a mararo. Empa, Thaka le le nyenyane, le le sesane seemong, monyenyan haholo, A shebahala a ke ke a feta dipondo tse lekgolo le mashome a mararo ka boima.

<sup>17</sup> Mme ka sheba, mme yaka ho ba le ntho e nngwe, mono e ka nna yaba ke fositse. Ka baka leo ka—ka pikitla mahlo a ka mme—mme ka sheba hodimo hape. Mme A batla a eme ka mmoho, jwalo ka setshwantshong sa sefahleho sa Hae. Mme tshobotsi tsa sefahleho sa Hae, tseo ke di boneng kamehla diponong, e ne eka hlooho ya Hofmann ya Kreste dilemong tse mashome a mararo. Ke ka baka leo ke nang le sona ka lapeng la ka, dipampiring tsa ka, hohle moo nka beang ntho eo, hoba ke kamoo se neng se shebeha kateng, haholo jwalo. Feel, E ka o monyenyan.

<sup>18</sup> Mme ke ne ke leletse ke Mo shebile, ka nahana, “Ruri ha ke a sheba Morena wa ka ya emeng mono.” Mme ke ne ke batla ke le, nka re, ka mokgwa *wona*, mme mohlomong hantle moo ntho *ena*, tlasa moo sefala sena se leng teng jwale. Sebakeng se seng, e ne e le bohaufing bona hantle, ka hara, sedikising sa moo ke emeng, ha nka lekanya hantle, ka hara dijarete tse mashome a mane kapa a mahlano nng'e nngwe mona kaekae tikolohong ya setereke sena, sedikadikweng sena.

<sup>19</sup> Mme ka sheba hodimo, mme O ne a eme mono. Mme ka loma monwana wa ka, ho bona haeba ke ne ke kgalehile na. Le a tseba kamoo le . . . Eka ho ke ke ha ba jwalo feela. Mme ke sa

le motjha Moreneng nakong eo, ekaba dikgwedi tse tsheletseng ke ntse ke rera. Ka loma monwana wa ka. Ka tshwara brumseje mme ka e kgaola. Mme bongata ba lona batho ba mahaeng, le tseba nthwana eo lehlokwana le hlohlotsang leino, eka re lona, le teng brumsejeng. Ka qala ka tshohla ntho eo. Mme ka re, “Ho—ho ke ke ha etsahala. Ke a lora. Lapa leso ke lane. Ntate ke yane, mme, le bana mono. Letsha leo la kgale la ntlo ya ditene le ne le le teng mono, moo ke neng ke ye ke tsome magansi, dijarete tse ka bang makgolo a mabedi ka nqane ho sebaka sena. Mme ke nna enwa ke eme tshimong; ho loketse ho ba jwalo.”

<sup>20</sup> Ka raha fatse, ka tila ka maoto a ka ho se hokae, mme ka sisinya hlooho ya ka, le—le ho sotha matsoho a ka, ka sheba hodimo hape; ka sheba kwana, ka sheba hape, mme ke Eo moo a neng a le teng, a eme mono. Mme moyo wa qala ho foka, mme ka bona brumseje e fokaela. Mme yare ha e qalella ho fokaela, diaparo tsa Hae tsa fokaela le yona. Jwale ka diphahlo tse fanyehilweng terateng, tsa qalella ho—ho pheuleha. O ne a eme mono. Ka e sheba.

<sup>21</sup> Mme ka nahana, “Hola nka bona sefahleho sa Hae feela!” Mme O ne a shebile nqa botjhabela, hantle nqeng *ena*. O ne a e shebile, ka mokgwa o tsitsipaneng. Mme ka tsamaya ho potela ka kwana, ho bona sefahleho sa Hae hantle. Mme ke ntse ke sa kgone ho Mmona hantle. O ne a beile matsoho a Hae ka pela Hae, a mpa a patehile ho tswa moo ke neng ke eme teng.

<sup>22</sup> Ka tsamaya ke potela hape. Mme ka hlakisa mmetso wa ka, ntho e kang *ena*, ho re, “hum,” ho bona hore nke se hule maikutlo a Hae na. Empa ha A ka a sisinyeha.

<sup>23</sup> Yaba ke a nahana, “Mohlomong nka Mo bitsa.” Mme eitse ha ke re, “Jesu,” A sokolla hlooho ya Hae. Mme eitse ha A ntjheba, A phuthulla matsoho a Hae feela. Ke phetho seo ke se hopolang. Nako, mohlomong ho fihlela tsatsi le tjhaba, keha ke robetse hantle mona kaekae moo ntho ena e leng teng jwale, ka hara tshimo; hempe yaka ya pijama e kolobile, ke dikeledi, moo ke ne ke ntse ke lla. Mme ke ne ke ile ka idibana.

Sefahleho sa hae se ne se e na le dibopeho tseo ho seng setaki se neng—se neng se ka di tshwantsha kapa ho di taka. Di ne di ka sitwa. A shebahala jwalo ka Monna eo, hola le ne le ka Mo sheba, eka O tla lliswa ke kutlwelobohloko, le hlompho ka tshabo; mme leha ho le jwalo ka matla a lekaneng hoo, a na ka bua, a ne a ka phethola lefatshe. Mme dibopeho di ke ke tsa tshwarwa ke setaki.

<sup>24</sup> Mme ha ke eso tsebe ho fihlela tsatsi lena hore taba eo e ne e bolelang. Empa ke nna enwa bosius bona, ka mora dilemo tse mashome a mararo, ke eme odotoriamong e kgethetsweng jwale mosebetsi wa Modimo o Matlaohle. Mme nna, ke e—e setho feela, hantlentle, feela e—e moholo wa selehae ka hara—

ka hara kereke ya Baptise mona, eo Roy Davis e neng e le modisa nakong eo. Mme ke eme mona jwale ka sebaka se petetsaneng, hantle hodima setsha, ka...ntho eo ke nahanang, hore ke se rekilweng ke Madi a Jesu Kreste ka Sebele, matsohong a ka, ho tlisa Molaetsa wona wa Morena wa matsatsi a mane.

<sup>25</sup> Dikgwedi tse ka bang tshelela feela ka morao ho moo, ka tshwara kolobetso ya ka ya pele tlase mona nokeng, mohla Lesedi le theohelang fatshe mona Seterateng sa Spring. Bongata ba lona batho ting le ka batla ho theohela teng le ho e sheba, Seterateng sa Spring le metsi, hantle feela lebopong la noka. Mme ke hona moo Lengeloi la Morena le hlahileng phatlalatsa, pele, homme ka hora ya bobedi, thapama e nngwe. Mme Lentswe la tswa ho lona, la re, "Jwalo ka ha Johanne Mokolobetsi a rometswe ho etella ho tla ha Kreste la ho qala, Molaetsa wa hao o tla etella ho Kgutla la bobedi."

<sup>26</sup> Mona ke dilemo tse mashome a mararo ha morao, mme e sa le nna enwa, bosiung bona, ke bolela Molaetsa oo. Mme O se o potile lefatshe, mme ke thabetse ho kgutlela hape motseng wa heso, bosiung bona, ho emela Morena Jesu Kreste eo ke sa ntseng ke mo rata ka pelo yohle ya ka. Tsatsi ka leng O ntse a eketsa ho ba monate ho feta kamoo A neng a le kateng maoba. Ha ke eso fetole tlhakunyana Thutong ya ka. Ntho ya pele eo ke qadileng ka yona, ke sa ntse ke dumela ntho e tshwanang bosiung bona. E sa le yena maobane, kajeno, le ka ho sa feleng. Jwale ke na le Molaetsa oo ke jereng boikarabelo ba wona.

<sup>27</sup> Ha Molaetsa o ne o qala pele, ehlile, e ne e le, motho e mong le mong; e ne e le ho rapella bakudi, dipontsho tse kgolo, meeka, le mehlolo. Hoo ho qadile, haholoholo bathong ba Pentekosta, tsoseletso ya lefatshe ya letsholo la phodiso e haotseng lefatsheng. Dilemo tse leshome le metso e mehlano tse tiileng ho bile le ditsoseletso hodima leralla le leng le leng le teng, ke a tshepa, mello ya tsoseletso e a tuka. Hantle-ntle dimilione di amohetse Kreste jwalo ka Mopholosi wa bona, ka thomo e le nngwe eo. Hoo ha susumetsa, ho tswa moo, ho ya ho Oral Roberts, le jwalojwalo, le ho ya jwalo le ho ya jwalo, ha e ntse e potoloha.

<sup>28</sup> Ka morao, kereke ya Pentekosta e dutse e shwele e kghelemane, kamoo e ne e le kateng nakong eo. Ditabatabelo tsa ka le takatso, bosiung bona, ke ho tsoetsa kereke eo, hape, ho tleng ha Morena Jesu ho haufi. Ke loketse ho e kgalema. Ke loketse ho kgarumela sebe ka mokgwa ofe kapa ofe oo se leng ka kateng. Ha ke o bolele kerekeng ya bodumedi ya motho. Ke na le Molaetsa.

<sup>29</sup> Jwale, ho thata ho kena kerekeng bakeng sa tshehetso ya tjhelete, jwalo feela kaha ho etsahetse ka Morena wa rona Jesu, hoba ke Yena; ha se nna. Empa jwaloka ha A rerile qalong,

mme a foidisitse bakudi, ho tsosa bafu, le ho ntlafatsa balepera, le ho leleka matemona, motho e mong le e mong a Mmatla. Empa ho fihla nako eo ho bang le Molaetsa o salang pontsho e nngwe le e nngwe morao, hoba pontsho e-na le lenseswe.

<sup>30</sup> Empa yare ha A dula fatshe tsatsi le leng, mme a re, “Nna le Ntate wa Ka re Bang,” e le taba e thata ho feta eo ba ne ba ka e emela. Hape, e ne e le, ha A ne a re, “Ha le sa je nama ya Mora motho mme la nwa Madi a Hae, ha le na Bophelo ka ho lona.”

<sup>31</sup> “Jwang?” Kgele, dingaka le batho ba nahanang hantle ba ka be ba itse, “Monna enwa ke senwamadi sa motho, o leka hore le je nama ya hae le be le nwe Madi a Hae.” Ha A ka a e hhalosa. O e buile feelsa.

<sup>32</sup> Mme bosiusing bona le ka utlwa dintho, le kopanong ho tswella, tse buuwang feelsa. Mohlomong re ke ke ra kgona ho hhalosa. Empa, hopolang, Jesu Kreste e sa le yena maobane, kajeno, le ka ho sa feleng. Re a e dumela.

<sup>33</sup> Jwale, ha re na nako ya ho buwa haholo, hoba re na le dinako tse beilweng tsa ho qala mona le dinako tsa ho tswa. Mme re batla ho hlonephla lekgotla la sekolo le re beetseng dinako tsena, mme re tla etsa hohle hoo re ho kgonang ho di hlompha.

<sup>34</sup> Hopolang, nako le nako ha moetsadibe a batla ho tla ho Kreste, ntho yohle eo o ka e etsang ke ho nyoloha hantle, e leng hore ke a rera, bina, seo e ka bang sona feelsa, mme o fe Kreste bophelo ba hao hantle hona moo, ema setulong sa hao. Ke seo re leng mona ka sona, ho le thusa.

<sup>35</sup> Ke batla ho bua le Moena Vayle, Moena Rober-... Borders, le baena mona. Ha e ba... Ke a ipotsa hore na ba ke ke ba tshwara, ka kerekeng, thapama, kapa hoseng ho hong, kapa ntho e nngwe, tshebeletso ya keletso bakeng sa bao ba batlang kolobetso ya Moya o Halalelang. Na hoo ho tla loka, lona baena? Moena Neville le lona bohole ba ka fihlang mono, le Moena Capps. Ha motho a batla ho eletswa mabapi le kolobetso ya Moya o Halalelang, hobaneng le sa tle Tabernakeleng... Ho ka loka neng, hoseng kapa thapama?

<sup>36</sup> [Motho e mong o re, “Hoseng.”] Hoseng, ka hora ya leshome mohlomong? Mohlomong hora ya leshome hoseng.

<sup>37</sup> Ha o na le potso Thutong, ha o na le potso Molaetseng, ha o—ha o batla ho... o eso rerelwe, ka bowena, o batla ho rapellwa, kapa ntho efe feelsa o batlang ho e tseba mekgweng eo, hobaneng o sa re kgalo tlase mono ka hora ya leshome hoseng mme o kopane le banna bana. Ho tla ba le a le mong wa bona kapa ho feta mono ho eletsa, ho rapella bakudi, ho araba dipotso ka boyena. O ye ho bona feelsa, mme ba tla thabela ho o thusa ka tsela efe feelsa eo ba ka kgonang.

<sup>38</sup> Jwale, pejana feela re atamela Lentswe, re batla ho atamela Mongodi wa Lentswe hape. O ka ja ho feta takano; o ka nwa ho feta tekano; o ka tsheha ho feta tekano; o ka tsamaya ho feta tekano; empa o ke ke wa rapela ho feta tekano le ka mohla. “Eka batho ba ka rapela hohle, ba phahamisitse matsoho a halalelang ho se pelaelo kapa kgalefo.”

A re rapeleng.

<sup>39</sup> Morena Jesu ya Ratehang, Moqadi wa Lentswe la Bophelo, mme Wena o Lentswe leo, re O atamela re hlabe hile ka mora ho hlalosa tsa pono. Etswe, Modimo, O a mpakela hore hoo ke nnene. Morena Jesu, ke rapela hore O tle o tlotse mantswe bosiung bona bakeng sa kutlo ya tsebe e nngwe le e nngwe e dutseng tlasa modumo o Mokgethwa. Mme ha ho e na le ba bang mona, kapa ba mametseng, ka ntle ho phatlalla le setjhaba, ha ba sa itokisa le ho itlhophpha horen ena ho kopana le phephetso ya hora, Molaetsa o tswang ho Modimo, ho baka le ho itokisa, hoba Mmuso wa Modimo o a atamela. Re rapela hore ho tle ho be jwalo, bosiung bona, ka bona, hore ba tla kopana le phephetso ya hora ena.

<sup>40</sup> O Modimo, ke rapella thuso, ka tsebo ya boikarabelo le seo e se bolelang, le seo ke tshwanetseng ho se arabela Tsatsing la Kahlolo, bakeng sa tsohle tseo ke di buang mona le dibakeng tse ding. Nthuse ho ba le botshepehi bo feleletseng, Morena, ka tsohle tseo ke di etsang kapa ho di bua Lentsweng la Hao, di tle di bee tholwana. Hoba, kamoo thomo ya Hao e ne e le kateng, “Lentswe lena le se ke la tloha molomong wa hao; empa o le nahane, motsheare le bosiu, o tle o hlokomele ho etsa ka tsohle tse ngodilweng molaong. Mme o tla atleha metsamaong ya hao, mme o tla ba le katleho e ntle. Hleka ha Kea ka ka o laela. O iphe matla o etse ka senna, hobane Jehovah Modimo wa hao o na le wena kahohle moo o yang teng.” Morena Jesu, etsa jwalo, bosiung bona. Re rapela Lebitsong la Jesu. Amen.

<sup>41</sup> Labohlano le Moqebelo, ho tloha ka hora ya leshome ho fihla ka ya leshome le metso e mmedi, Tabernakeleng mane 8th le Penn Street, ho tla nntshwa dikeletso, dikarabo tsa Thuto, dithapello tsa bakudi, le eng feela. Theoha hantle ha o na le potso efe feela, ntho efe feela eo o e hlokang. Ho tla ba le motho mono ho-ho tshwarana le yona. Morena a le hlohonolofatse.

<sup>42</sup> Jwale, bakeng sa pulo ya tshebeletso ena bosiung bona, nke ke ka etsa letho haese ho e phetla hantle ho Molaetsa wa rona. Ke seo re leng mona ka sona, mme jwale ke sona seo ke se kgutletseng.

Mme Sontaha hoseng, ha Morena a rata, ke batla ho kopana le phephetso e kgolo eo ya letsatsi, mabapi le *Lenyalo Le Hlalo*.

<sup>43</sup> Jwale, ho Bagalata 4:27, ke lakatsa ho bala Mantswe ana, 4:27 ho ya fihla ho 31, mmoho.

*Hobane ho ngodilwe ho thwe, Ithabele, wena nyopa ya sa tswaleng; tlerola o hweletse, wena o nong o hloka pelehi: hobane bana ba ya tlohetsweng ba tla fetisa ba ya nang le monna ka bongata.*

*Ha e le rona, banab'eso, re bana ba pallo, jwalo ka Isaaka.*

*Mme jwalo ka ha mohlang oo ya tswetsweng ka nama a na a hlorisa ya tswetsweng ka Moya, le jwale ho sa le jwalo.*

*Empa lengolo le re'ng? Le re, lelekisa ya rekilweng le mora hae: hobane mora wa ya rekilweng e ke ke ya e-ba mojalefa hammoho le mora wa ya sa rekwang.*

*Ka baka leo, banab'eso, ha re bana ba ya rekilweng,  
empa re le ba ya sa rekwang.*

<sup>44</sup> Morena a eketse mahlohonolo a Hae palong ya Lentswe la Hae. Jwale, ke dumela mona ke nka theron e kang ena, e makatsang, e sa tlwaelehang. Empa ka nako tse ding re fumana Modimo dihoreng tseo tse makatsang, tse sa tlwaelehang, ditsela tse sa tlwaelehang, dintho tse sa tlwaelehang, hobane Modimo ha o a tlwaeleha. Mme bao ba Mo sebeletsang ho tswa pelong ya bona ka nnete, ba Mo sebeletsa ka tsela e sa tlwaelehang, dinthong kapa mekgweng ya lefatshe. Sehlooho sena se bitswa: *Peo Ha Se Mojalefa Hammoho Le Lekqapetla.*

<sup>45</sup> Paulose mona o bua ka peo ya seqo ya bara ba babedi ba Abraham. Paulose, ka thabo, o ipea maemong a tswalo ya mosadi ya sa rekwang.

<sup>46</sup> Jwale, re a tseba Abrahama o ne a e-na le bara ba babedi, ka basadi ba babedi ba fapaneng, Modimo o mo file tshepiso ho Sara, ka Sara, ke rialo, ho no ho tla tswalwa Mora, mme ka Mora enwa lefatshe le tla hlohonolofatswa. Ditjhaba tsohle di tla hlohonolofatswa ke Mora enwa. Mme ka tlwaelo ho dumelwa, haholo hara baJode, hore enwa e ne e le Isaaka, empa e ne e se yena. Mora enwa ya tshepisitsweng wa Abrahama ke Jesu, mme Ke wa tshepiso ya Peo ya Borena, ya Abrahama. Empa Abrahama ka ho ba le bara ba babedi...

<sup>47</sup> E mong ka-ka Agare, eo e neng e le lekgabunyane la mosadi wa hae; e motle, ya bohehang, lekgabunyane la moEgepeta leo Abrahama a mo nketseng lona tlase Egepeta, ho ba e... lekgabunyane la mosadi hae. Mme Sara, kgopolong ya hore Modimo o ke ke wa boloka tshepiso yohle ya Wona ka nnete, a laela Abrahama ho nka Agare, lekgabunyane la hae, le ho mo nvala. (etswe, sethepu se ne se le molaong mehleng eo) le

ho tlisa ngwana; mme ke kamoo Modimo a na e radile kateng, hore o na tla fumana ngwana ka Agare feela. Empa re fumana ho no ho se jwalo.

<sup>48</sup> Jwale re utlwisia, hape, hore Modimo o phethehile ka bo-tharo. Jwale, Modimo o “phethehile” ka *boraro*. “Mohau” ke *hlano*. *Supa* ke qetello,” jwalo ka lefatshe.

Modimo o phethehile ho Ntate, Mora, Moya o Halalelang. Ke phetheho ya BoModimo. Tsohle ke Modimo o le mong, diponahatsong tse tharo, tsa mehopolo e meraro ya ofisi e le nngwe, kapa diofisi tse tharo BoModimong bo le bong.

<sup>49</sup> Jwale, hape ho na le boraro phethehong, ba mehato e meraro ya mohau, Kerekeng; tokafatso, hlatsuo, kolobetso ya Moya o Halalelang. Hoo ho bopa Tswalo e Ntjha, jwalo feela ka ha tswalo ya nama e tshwantshwa ke hona. Etswe, mosadi ya tswalang ngwana, ntho ya pele e tlang ke metsi, madi, mme e nto ba bophelo.

Bibele e boletse, ho Johanne wa Pele 5:7, kapa 7:5, kea kgolwa ke yona, e itseng, “Ho le ba bararo ba pakang Lehodimong; Ntate, Lentswe,” leo e neng e le Mora, “le Moya o Halalelang; boraro bona ke ntho e le Nngwe. Ho le tse tharo tse pakang lefatsheng;” Lentswe, “metsi, madi, le Moya. Metsi, madi, le Moya; tse tharo tsena di *dumellana* nthong e le nngwe.”

<sup>50</sup> Jwale, Ntate, Mora, le Moya o Halalelang, ba Bang. O ke ke wa ba le Ntate ntle le ho ba le Mora; o ke ke wa ba le Mora ntle le ho ba le Moya o Halalelang. Empa o ka lokafatswa ntle le ho hlatsuwa; o ka hlatsuwa ntle le ho tlatswa ka Moya o Halalelang. Re supile taba eo tatelanong ya tlhaho.

<sup>51</sup> Jwale, mme bongata ba lona, mohlomong, nka ba hosele le lona. Mme ke—ke hloka thuto; kea kgolwa le se le utlwisia. Empa ke ruta ka dipapiso, jwalo ka ha tsa tlhaho di tshwantsha tsa moya.

<sup>52</sup> Jwale, re ka bona hoba ho na le tse tharo phethehong. Modimo o phetheha ka bo-tharo, jwale. Mme taba e ileng ya hlaha, phethehong ya peo ya Abrahama, e ne e le Ishmaele, Isaaka, Jesu. Ishmaele ya tswang ho mosadi ya rekilweng. Isaaka ya tswang ho mosadi ya sa rekwang, mme bobedi ba bona ka kopano ya botho; empa Kreste Jesu o tswa ho morwetsana, ho se kopano ya botho ho hang.

<sup>53</sup> Mona, “Peo,” e le nngwe, Peo e le nngwe; e seng dipeo, empa Peo e le nngwe. Ba bang bana e ne e se peo ya Abrahama, hobane “Peo” ya Abrahama e ne e le Peo ya tumelo ya hae eo Modimo a na a bua ka yona, e seng peo ya hae ya nama. Hoba, ka mora ho shwa ha Sara, Abrahama o ile a nyala mosadi e mong mme a ba le bara ba supileng, ntle le baradi. Ka hona e ne e ke ke ya e-ba dipeo tsa Abrahama, e ne e le “Peo” ya Abrahama, e le nngwe. Mme e ne e le peo ya Abrahama ya

tumelo, e ne e supa Peo ya Borena e neng e tla tla ka tumelo ya Abrahama; e seng bophelo ba nama ba Abrahama, empa bophelo ba moyo ba Abrahama; ya ileng a nka ntho e nngwe le e nngwe e kgahlano le Lentswe la Modimo mme a e bitsa jwalo ka hoja e le siyo, mme a dumela Modimo; tshepo e le siyo, a dumela tshepong. Ke Peo ya nnete eo re buang ka yona.

<sup>54</sup> Mona re bontshwa setshwantsho. Oh! Peo e qadile, peo ya tshepiso, e qadile ka pelaelo e nyenyane, pelaelo ya tshepiso ya mantlha. Le bona kamoo e qalang tlase, ka pelaelo tshepisong ya mantlha. Modimo o tshepisitse Abrahama, ka Sara, hoba le ngwana enwa. Empa jwale shebang, peo ya pele ya Abrahama ka mosadi ya rekilweng e tlide ka Sara ya belaetseng hore taba ena e ne e ka etswa, hoba o ne a tsofetse mme a fetile dilemo tsa ho beleha.

<sup>55</sup> Mme ke kamoo kereke e qalang. Ke kamoo e qalang kamehla. O qala bohatong. Ha o qale hloring. Monna ya lekang ho hlwella lere, a leka ho fihla hodimo pele, o tla roba molala wa hae. O loketse ho qala le ho haha o nyolohela hodimo nthong eo.

Mme mona re fumana qalo ya tshepiso ya Modimo e bonahatswa, ka pelaelo e nyenyane, leano la Modimo le kgaoleditsweng.

<sup>56</sup> Ke tsela eo sebe se qalang tshimong ya Edene. Ke kamoo lefu le qadileng ka sebe, ke mohla lentswe le le leng la Modimo le neng le sokamiswa kapa le belaelwa. O ke ke wa belaela kapa wa bea Lentswe le le leng la Modimo sebakeng se phoso, hoo ke HO RIALO MORENA, hoba Ke ho re Lentswe ka leng ha le be jwalo.

<sup>57</sup> Mme mona Sara, esita le yena eo tshepiso (Sara kaha e ne e le mosadi, e leng papiso ya kereke), a belaela lenaneo la mantlha la Lentswe la Modimo le tshepisitsweng, mme a re, "Wena, Abrahama, monna wa ka, inkele lekgabunyane lena le letle, mme o phele le yena, mme o be monna wa hae. Mme Modimo ka yena o tla fana ka peo ena e tshepisitsweng, mme nna ke tla nka ngwana." Le a bona, ka ho kwekwetla tlhakunyana e le nngwe feela, ya fetola lenaneo lohle.

Ha ho le jwalo, re loketse ho nka Lentswe le leng le le leng la Modimo jwalo ka HO RIALO MORENA. Lentswe le leng le le leng la Modimo le lokile.

<sup>58</sup> Mona jwale peo e qala ka tshepiso, e belaetsweng ha nyenyane. Isaaka e leng peo ya mosadi ya sa rekwang le ya tshepisitsweng, o hlahisitse, jwalo ka ha Paulose a ne a leka ho hhalosa mona ho Bagalata, o hlahisitse, peo ya nama, e tshepisitsweng. Mme o tswelapele ho bolela mona ho re—ho re bana ba mosadi ya rekilweng e ke se be mojalefa hammoho le bana ba mosadi ya sa rekwang, hoba ke dihlopha tse pedi tse fapaneng.

<sup>59</sup> Mme, hoo ke nnete, moetsadibe e ke se be mojalefa mmoho le modumedi. Ha ho tsela, ho hang. Ke hona moo bothata bo leng teng kajeno. O ke ke wa etsa hore tsuonyana ya phutheho ya bodumedi e dumele mmoho le ntsu. O ke ke wa etsa jwalo feela. Ke hona moo bothata bo hlahang teng. O loketse ho dumela Lentswe le leng le le leng la Modimo. O mpa feela... Ha le majalefa mmoho. Le jwalo o ke ke—wa ikopanya le yona; o ke ke wa etsa hoo. O loketse ho ba ntsu kapa kgoho.

<sup>60</sup> E ne e ke ke ya eba mojalefa le Ishmaele, peo ya mosadi ya tlamilweng, wa... ka baka la ho belaela. Sara o ile a belaela Lentswe la Modimo, hore Modimo o ka kgona ho Le boloka. Lemohang Abrahama! Le bona seo ke se hahang bakeng sa Sontaha hoseng. Ha se Abrahama ya belaetseng. Sara ke yena ya e belaetseng; e ne e le yena. E ne e se Adama ya belaetseng; e ne e le Eva ya belaetseng. Ka baka leo, he, re tla fumana haholwanyane ka dintho tseo ha re e nka Sontaha hoseng.

<sup>61</sup> Le jwalo motho wa moya a ke ke... wa tlhaho ya e-ba mojalefa hammoho le motho wa moya. Esita le jwalo ka ha bana ba Ishmaele e ke ke ya eba mojalefa le—le bana ba Isaaka, mme le jwalo motho wa nama e ke se be mojalefa le motho wa moya.

<sup>62</sup> Kereke ya tlhaho; Kereke ya moya. Ho na le kereke ya tlhaho e tshwantshwang ke basadi bana mona; mme ho na le Kereke ya moya, hape. Ka baka leo, kereke ya tlhaho le Kereke ya moya e ke se be majalefa mmoho. Bobedi ba bona ke dinako tse pedi tse fapaneng, tse arohaneng; ke batho ba babedi ba fapaneng, ba arohaneng; tlasa dilekane tse pedi tse fapaneng, tse arohaneng.

<sup>63</sup> Ke ka hona Tlhwibilo e fapaneng, mme e tla ba bakeng sa Peo ya Borena ya Abrahama feela. E ke ke ya tla ka ya tlhaho, peo ya nama ya kereke. E ka kgona ebe Peo ya borena ya Lentswe la Modimo, ka Abrahama, Peo ya borena. Ke ka hona Tlhwibilo e loketseng ho tla pele.

Hoba, le hopole, “Rona ba phelang le ba saletseng re ke ke ra raka, ra sitisa ba robetseng. Hoba terompeta ya Morena e tla lla, ba shwetseng ho Kreste ba tla tsoga pele. Rona ba phelang le ba saletseng re tla nnkuwa le bona, mmoho, re nto kopana le Morena sebakeng.” Lemohang, mme ho ngodilwe hape, “Mme bafu ba bang ha ba ka ba phela, ka dilemo tse sekete.”

<sup>64</sup> Ha ho le jwalo, mono, e ke se be majalefa mmoho. Ba ke ke ba kena Hlwibilong mmoho. Ho na le kereke ya tlhaho ka ruri, le Kereke ya moya; kereke ya nama, Kereke ya moya. Mme hape, le a bona, mona ha ho...

<sup>65</sup> Ha ho Kahlolo Peong ya borena, ya moya, e reretsweng pele ya Abrahama, hoba ba reretswe Bophelo bo sa Feleng e sa le pele. Ba amohetse Sehlabelo sa Modimo se lokisitsweng; mme Sehlabelo seo, e ne e le Kreste, Lentswe.

“Mme ha ho le jwalo ha ho sa le tsuo.” Mohalaledi Johanne 5:24, ha le batla Lengolo leo. “Ha ho le jwalo ha ho sa le tsuo jwale ho ba leng ka ho Kreste Jesu,” Baroma 8:1, “ba sa tsamayeng ka nama, empa Moya,” ho Baroma 5:24, “Ya *utlwang* Lentswe la Ka,” mono lentswe ke, “*utlwisisang*.” Letahwa lefe kapa lefe, ntho efe feela, e ka Le utlwa mme ya nto tloha e ikela. “Empa ya *utlwang* Lentswe la Ka, ya *utlwisisang* Lentswe la Ka, mme a dumela ho Ya Nthomileng, o na le Bophelo bo sa Feleng, mme a ke ke a tla Kahlolong; empa o tlohile lefung ho kena Bophelong.” E, monghadi.

Ya tsebisitsweng sephiri se seholo sena sa Modimo, o a *utlwisia*, kamoo Modimo o nong o le ka ho Kreste o Ikgutlisetsa lefatsheng, kamoo Yena le Ntate ba neng ba le Bang, kamoo diphiri tse kgolo tsa phethahatso ya Modimo ka ho nka le ka ho itlisa ka boWona, ho bonahatswa mongwaheng wa batho, le mophuleng wa batho, le mokgatlong wa batho; ho tsebahatsa Lentswe la Wona tsatsing leo, ka nqa botjhabela moo tsatsi le tjhabang teng, le ho etsa yona ntho eo nakong eo letsatsi le dikelang bophirima, ho Iponahatsa ka hare ho Kereke ya Monyaduwa, Lentswe le bonahaditsweng. Le a bona? E tla etsa jwalo, le Yona. “Ya *utlwisisang*,” ke ho re, “ho tseba, ya senoletsweng hona, ke Ya Nthomileng, o na le Bophelo bo sa Feleng, mme a ke ke a tla Kahlolong; empa o tlohile lefung ho kena Bophelong.”

<sup>66</sup> Peo ya tlhaho e ne e mpa e le pelesa ya ya moya, Peo. Jwalo ka tlhaka, tjellane, le lekgapetla. Re fetile ntlheng eo pele, Molaetseng o mong, empa ke rata ho o shebela- pele ho se hokae, tabeng ena, kapa ho kgutlela morao ho oona motsotso feela.

<sup>67</sup> Jwale mona ho na le mehato e meraro ya peo, e re bontshang setshwantsho sa nnete, mehato e meraro ya peo ya tlhaho lefatsheng. Jwalo ka ho jalwa peo, e hlahisa tlhaka, maqoba a mela ho yona; e nto ba tjellane, modula o ntano itshwarella teng; e nto ba lekgapetla; e nto ba peo hape.

<sup>68</sup> Shebang mehato e meraro ena ya setshwantsho se phethahetseng sena mona, le kamoo se tsamaelanang hantle le papiso, hoba Modimo ke mothei wa hlaho yohle. Ha ho le jwalo hlaho e ke ke ya hloleha esita le jwalo ka ha Modimo o ke ke wa hloleha, hoba e le Wona o re be-beetseng ntho ena madulong ho e sheba le ho bona.

<sup>69</sup> Lemohang Agare, tlhaka, e beng e le qalo ya Peo e qalang ho mela. Jwale, e ne e sa tshwane le Peo ka letho. E ne e le tlhaka, hoba e ne e le mosadi ya tlamilweng, a le siyo tshepisong ho hang; a sa amane le Lentswe ka letho, e mpa e le mothoti wa Peo feela.

<sup>70</sup> Lemohang Sara, tjellane e neng e e-na le modula, setjhaba seo sa baJode se tswile ho yena. Ho tswa, ho tswa ho Sara, a tlisa Isaaka; ka Isaaka, ho tliswa Jakobo; Jakobo a tlisa bapatriareka; mme ka bapatriareka, ho hlahiswa setjhaba.

<sup>71</sup> Maria, tumelo ya morwetsana, e hlahisitse wa nnete, Peo Lentswe la moyo le entsweng nama. Le a bona?

Basadi ba bararo, basadi ba bararo bao Peo ena e jerweng ke bona. Hantle-ntle e mong wa bona e bile bohlola, tlasa sethepu; wa bobedi e le mosadi ya sa rekwang; mme wa boraro a se ke a amana le kopano ya bong ka letho, empa ka tumelo a dumela Lentswe la Modimo. Agare, Sara, Sara le Agare bobedi, e ne e le kopano ya botho; empa Maria e ne e le morwetsana, ka matla a Lentswe le tshepisitsweng la Modimo. Ke hantle.

<sup>72</sup> Tlhaka, Agare (basadi ba babedi), ba belaela tshepiso, empa hlokomelang hore hoo ho ile ha hlahisa'ng. Nakong eo Agare, mosadi wa bobedi wa Abrahama, eo e neng e le mosadi wa serethe feela ruri, empa a tswala monna, empa (e le monna wa mofuta ofe?) Bibele e itse e ne e le "monna ya hlahah." A phela ka seqha sa hae, mme ho se motho ya ka mo hlolang. A ke ke a thapiswa, a ke ke a sokoloha, a ke ke a ntjhafatswa. A ke ke a thapiswa. E le monna ya hlahah, hoba a tlide ka tsela e kgahlano le Lentswe la Modimo.

Mme ntho ka nngwe e kgahlano; moreri ofe, setho sefe, kereke efe, e kgahlano le Lentswe la Modimo; e tla hlahisa sekgakgatha se hlahah, sa dihlola tsa Hollywood ya lefatshe, mme se ke keng sa ema le Lentswe le sa angwang, hoba le tshepisong ha se a kenyaletswa. Tjhe.

<sup>73</sup> Sara, mosadi wa sebele wa tshepiso, e leng tjellane, a tswala monna ya kgabane. Ka mora moo, ha hlahiswa setjhaba sa tshepiso se ileng sa sebeletsa Modimo. [Sekgeo lebanteng—Mong.]

Empa, Maria, ntle le kopano ya botho ho hang, empa a dumela Lentswe la tshepiso; e sa le morwetsana, a sa tsebe monna wa letho. Mme Lengeloi la Morena la kopana le yena, la re, "Ahe, Maria, o lehlohonolo hara basadi, hoba Modimo o na le wena."

<sup>74</sup> Mme a re, "Dintho tsee di ka hlahah jwang?" A... A rialo.

<sup>75</sup> Lengeloi la re, "Moya o Halalelang o tla o kgurumetsa."

<sup>76</sup> Taba e ne e-so etswe mengwaheng yohle, empa Maria a dumela Modimo. Mme a re, "Bona lekgabunyane la Morena ke lena." A dumela Lentswe.

O tla le fumana jwang? A tseba hore Agare o fumane lesea ka takatso ya bong, le Abrahama; le Sara o fumane lesea ka takatso ya bong, le Abrahama, bana ba tshepiso; mosadi ya tlamilweng le mosadi ya sa tlangwang. Empa mona o koptjwa

ho dumela. Ke nyehelo tumelong e neng e le ho Abrahama, ya neng a dumela dinthong tse ke keng tsa etswa, “Ha feela Modimo o itsalo, ho lokile.”

<sup>77</sup> A dumela Modimo, a se ke a botsa. A re, “Bona lekgabunyane la Morena ke lena. Ho sa tsotolehe ke hloris e kakang eo ke loketseng ho jara ho tswa lefatsheng, ho be ho nna ho latela Lentswe la Hao.” Ke moo ho hlaha Peo ya makgonthe.

<sup>78</sup> Sara o ne a ke ke a etsa hoo, hoba e bile kopano ya bong. Ke hantle. Le Sara o ne a ke ke a kgona, hoba e bile kopano ya bong.

Le kereke e ke ke ya kgona, tlasa bora-seng! Ho batlwa tumelo e sa angwang Lentsweng la Modimo ho phetha tshepiso, ho tswala bana. Bora-seng bo ke ke ba hlahisa Kereke e tswetsweng botjha. Bo ke ke ba kgona. Bo tla hlahisa ntho ya phapanyetso. Bo tla hlahisa ho hong, nthwana e Le etsisang, nthwana e itseng e lekang ho tshwana le Lona.

Empa Kereke ya Modimo ya makgonthe, e tswetsweng la bobedi e dumela Lentswe la Modimo pontsheng ya ntho e nngwe le e nngwe, ho sa tsotolehe hore e ka ba eng, hoba ha e a angwa. Dintho tsena di tla ka tshepiso ya Modimo.

<sup>79</sup> Maria, yena wa nnete, o ile a re, ka...-ntle le kopano ya bong, a re, “Ho be ho nna ho latela Lentswe la Hao. Bona lekgabunyane la Hao ke lena!”

Mme o ile a hlahisa. O ile a hlahisa eng? E seng monna ya hlaha; e seng setjhaba. Empa a hlahisa Lentswe, Modimo ka Sebele o bonahaditswe nameng; amen, Peo ya nnete ya Modimo e bonahaditseng tshepiso e nngwe le e nngwe eo Modimo a e entseng ka Bibeleng; ka ntle ho Yena, ha ho motho ya ka phelang ka ntle ho Yena.

<sup>80</sup> E ne e le peo ya nnete, a le ka nnqane ho tje-...e ne e le lekgapetla le hlasisitseng Thollo. Jwale, ba bang ba babedi e ne e le bajari ba Bophelo, jwalo ka peo ya tlhaho feela. Maria...Jwale, hopolang, ke itse ba bang ba babedi...Jwale, Maria, le se mo etse Modimo, jwalo ka ha batho ba bang ba leka ho mo etsa. E ne e se modimo wa letho. Tjhe, monghadi. E ne e mpa e le mojari wa Peo feela, jwalo ka ho etsahetse ka ba bang bohole; empa, jwalo ka tumelo Lentsweng, ho atametswa setshwantsho sa nnete ho feta.

<sup>81</sup> Jwalo ka ha thollo e butswa, kapa koro. E a hlaha, tlhaka; e nto hlaha, modula; e nto hlaha, lekgapetla. Empa ha o nahana, lekgapetla leo, ha o sa hlokomele, le tla shebahala hantle jwalo ka koro ya nnete. Empa ha le bulwa, peo ya nnete e kahare. Ke mojari feela, hape.

<sup>82</sup> Ka baka leo, le a bona, Maria, ntle le kopano ya botho, empa ka tumelo; ntho e tshwanang le Yona hantle. Maria e ne e se Peo eo. Maria e ne e le mojari wa Peo.

E ne e le Peo ya makgonthe, ya tumelo, hoba Lentswe la Modimo le tlide ka tumelo eo Modimo a e fileng Abrahama. Mme ke tumelo feela e ka hlahisang seo Modimo a itseng O tla se etsa; tumelo Lentsweng la Wona.

<sup>83</sup> Lemohang kamoo jwaloka Ntho ya mannete, Maria a ne a atametse kateng, empa jwalo ka lekgapetla. Lekgapetla le kopela peo ka ho lona mme le a e sireletsa, le ho e disa ho fihlela e ikemela ka boyona, e butswa. Le mongwaha wona wa phutheho ya boraro (wa Pentekosta) o butswitse, ho tshwara Thollo ena ho fihlela e le nako ya ho bula lekgapetla. Maria, ka ho ba mme wa Kreste, e ne e le seqhotsisi feela.

E ne e se madi a letho a Maria; E ne e se madi a letho a moJode; E ne e se madi a letho a Moditjhaba. E ne e le Madi a Modimo. Modimo o hlotse Madi ana. E ne ke ke ya ba kopano ya botho. E ne e se moJode kapa Moditjhaba.

<sup>84</sup> Lesea ha le na phophinyana ya madi a mme. Madi a tswa ho ntate. Re a tseba hemotlelobine e ka hara botona.

Jwalo ka kgoho, e ka fuama lehe, sethole se ka etsa jwalo; empa ha se sa ka sa kopana le nonyana e tona, mokoko, le ke ke la qhotsa. Ha le a nona, leha le ka shebahala hantle jwalo ka lehe la nnete le nonneng. Semelo ka seng sa lona se bonahala se tshwana, empa ha le na bophelo ka ho lona.

<sup>85</sup> Ho jwalo le ka batho ba ipolelang Kreste. Bongata ba bona bo shebahala jwaloka Bakreste, bo leka ho itshwara waloka Bakreste; empa o loketse ho ba le Kreste ka ho wena, e leng Lentswe le bonahaditsweng, ho seng jwalo e ke ke ya butswa ya fetoha Mokreste ya dumelang Bibebe. Kamehla e tla be sa le e le ntho e itseng ya phutheho. E ke ke ya phela, hoba ho se Bophelo ka ho yona, ho phela.

Lehe le ke ke la qhotsa, le bolla ka hara sehlaha hantle, ha e sa ka ya ba le—ya ba le nonyana e tona.

<sup>86</sup> Jwalo ka ditho tsa kereke feela. O ka ba nenesa mme wa ba bitsa, ho ba etsa batikone le ntho e nngwe le e nngwe e sele, empa ba tla...o fumana sehlaha se tletseng mahe a bodileng haese ha ba kopane le Molekane. Ke hantle.

<sup>87</sup> Mosikari, lekgapetla, le a e disa. Ke hantle. Ebe yona, ke ho re, peo ka boyona, e loketse ho siya lekgapetla, kapa lekgapetla le loketse ho siya peo, ho bea peo pontsheng ya letsatsi, e tle e butswe. Tsohle papisong, re a bona.

<sup>88</sup> Le bona mona jwale ka moo e atametseng, kereke ya matsatsi ana a qetelo, e ya e tshwana le Peo ka BoYona. Shebang ka moo phutheho ena e hlophilweng ya Pentekosta e hlahileng matsatsing a qetelo, mme re tla e hhalosa hamoraro, le a bona, kamoo ba tleng eka Peo hantle.

Ha lekgapetla le tswa thollong ya koro...kapa qoba ya koro, hoba modula o wele mono mohatong wa bobedi, mme o

se o hlahisitse mohato wa boraro e leng e—e—e lekgapetla. Le kamoo seo se... Ha o se molemohi ya hlwahlwa, o ke se kgone ho bolela hore eo ke thollo ya makgonthe ya koro ka mono. Ha thollonyana eo ya pele e hlahala, e shebahala jwalo ka thollo, empa dula fatshe mme o e bule mme o tla fumana ho se thollo mono ho hang. Ke lekgapetla feela, mothoti wa thollo. Jwale, thollo e tswa nthong eo. Empa hopola, ha ho sa na letho ka mora lekgapetla leo.

Hopolang, ha ho a ka ha hlola ho eba le Peo e tshepiswang ka mosadi, kae kapa kae, ka mora Maria. Mme ha ho sa na phutheho tsa bodumedi tse tshepisitsweng ka morao ho Pentekosta. Ke Tlhwbilo le Monyaduwa ya tswang mono, Peo, Lentswe le bonahaditsweng hape.

<sup>89</sup> Lemohang, bonang e atametse ha kakang tjhebahalong. Matheu o boletse, Mohalaledi Mattheu 24:24, e boletse, ho re, "Meya e mmedi matsatsing a qetelo," moya wa kereke wa batho ba kereke, le Moya wa Monyaduwa wa batho ba Monyaduwa, "e tla bapa hakana ho ka thetsang le bona Bakgethwa hola e le ntho e ka etswang." E atametse ha kaalo.

<sup>90</sup> Shebang kamoo e fetileng tlhakeng. Jwale lemohang, re tlilo bapisa ntho e nngwe mona.

Luther, mongwaheng wa kereke, ho hlahisa Peo Monyaduwa, e ne e le ntho e tshwanang Moyeng. Thollo e le nngwe feela e nyenyane ya Peo, eo Luther a ileng a ema hodima yona, moo e le ho bewa ya lokileng ka tumelo. E le yona papiso ya Agare, tlhaka.

Lemohang, Wesley e le papiso ya Sara, Mofiladelfia, mongwaha wa lerato o hlahisitseng tjellane. Mono mongwaheng wa Wesley ho bile le barongwa ba bangata ho feta mongwaha ofe feela oo re bileng le wona, mongwaha o moholo wa boromuwa wa nako ya John Wesley.

<sup>91</sup> Empa Pentekosta e ne e emetse Maria. Maria, mohato wa Yona wa ho qetela, jwale, e ne e se Peo. Leha ho le jwalo, Bophelo ba Peo bo ne bo le ka ho yena, empa E eso butswe. Ke ikutlwaa ke halalela haholo. E ne eso butswe. E ne e le teng, empa E sa butswe.

Ho jwalo le ka mongwaha wa Pentekosta oo re phelang ho wona! Ho loketse ho hlahala e—e Lentswe la Modimo le ka ho yena, le sa hlophisiwang, ka ntle ho diemo tsa phutheho eo e hlophilweng.

<sup>92</sup> Luther o ile a fetoha lekgapetla ka lentswe la hae la pele, "Ba lokileng ba tla phela ka tumelo." Wesley o ne a e-na le mantswe a mabedi, "kgalaletso," mosebetsi wa sebele wa mohau. Pentekosta ya ba le lentswe la boraro, "kgutlisetso ya dineo." Empa Peo yohle e loketse ho tla! Le bona kamoo ba hlophisiwang hodima lentswe le le leng, le lentsweng le leng, le lentsweng le leng?

Empa e ka kgona ho be le Ntho e nngwe e ke keng ya hlophiswa; ke Bophelo bo tletseng bo ka mono, bo loketse ho Itlhahisa hape Monyaduweng. Ho ke se hhole ho ba le mengwaha e meng ya kereke ka morao ho wona. Re pheletsong, baena le dikgaitsedi. Re mona. Re fihlile. Ho bokwe Modimo! Amen. Jwale, re a bona dintho tsena di tiile feela ka moo ho ka bang kateng.

<sup>93</sup> Le jwale re sa ntse re lemoha, he, haeba yena e leng tjellane, kapa...Wesley e ne e le tjellane; Pentekosta jwale he e ne e le lekgapetla, e leng mohato o latelang wa Thollo e hlhang. Empa, moena, kgaitsedi, tlhaka ha se Thollo, le jwalo tjellane ha se Thollo, le jwalo lekgapetla ha se Thollo; leha, nako le nako ha e butswa, le shebahala jwalo ka Thollo ho feta.

<sup>94</sup> Tlhaka ha e shebahale jwalo ka thollo. Ebe ho hlaheng? Tjellane, kotolana; e shebahala jwalo ka thollo ho feta—ho feta kamoo qoba e leng kateng. Ntho e latelang ke eng? Lekgapetla; le tshwere thollo, le disa thollo.

<sup>95</sup> Jwale shebang morao mona tshepisong eo Modimo a e etseditseng Abrahama, ya “Peo ya hao,” ho buua moyeng. Mang le mang wa rona o tseba hono. O ne a bolela Kreste, e seng Isaaka; ka Peo ya hae ya tumelo.

<sup>96</sup> Lemohang, ya pele e tlie ka mosadi ya rekilweng, e sa shebahale jwalo ka tshepiso ho hang. Modimo ha o a lokela ho kgutlisa Lentswe la Wona ka baka la motho ofe feela. Modimo o boletse kamoo e tla tla, mme ke kamoo e tla tla kateng. Empa, Sara, ya emetseng kereke, papiso ya kereke, yona (a) fumana mono, hore o itse, “Tjhe, ke dumela ha taba ena e batla e le mohlolo. Esita le ho e dumela ha ke kgone, ka hona tsam’o nka Agare mme o inkele yena jwalo ka mosadi.” Le a bona, mono, tlhaka eo e ne e sa shebahale jwalo ka tshepiso, ho hang.

Empa eitse ha Sara a tla, jwale, e shebahala hantle haholo. E shebahala haholo jwalo ka tshepiso mono, empa leha ho le jwalo e ne e ntse e se tshepiso ya makgonthe. Hobane, Iseraele, ka Isaaka, e hlolehile ya ba ya latola Peo ya makgonthe ha E fihla. Alleluia! (Le se rwalehe, le se balehe. Hoo ho ke se le lematse.) Ho latola Peo, ba Mo thakgisa, mme ba Mo feha sefapanong!

<sup>97</sup> Jwalo feela ka ha Paulose a boletse mona, “Na ha se—peo ya—ya mosadi ya sa rekwang...kapa mosadi ya rekilweng e hlorisitseng Peo ya mosadi ya sa rekwang?”

Mme le jwalo peo ya phutheho e hlophilweng e hlorisa Thollo ya makgonthe. Ho loketse ho ba jwalo kamehla. E ke ke ya ba majalefa mmoho. Ha di tsamaye mmoho. Ke ditshepiso tse pedi tse fapaneng ka ho tiya, dinako tse pedi tse fapaneng, batho ba babedi ba fapaneng, ho hang. E mong ke Monyaduwa, mme e mong ke kereke. Ha ho papiso, ho hang, ho tsona.

<sup>98</sup> Empa bao e sa ntse e se Peo e tshepisitsweng ho tla. Le Sara, ha ho a ba jwalo le ka... Le Agare, le Sara, kapa—kapa Maria, e se Peo.

Maria e ne e se Peo. E ne e le mojari wa Peo, empa o ne a disitse, ho ntsha popelong ya hae. Jwalo feelsa ka lekgapetla, le ntshitse Peo ya nneta popelong ya lona, empa lekgapetla ha se Peo. Le mpa feelsa le... Le haufi-ufi le Peo. Le kopetse Peo ka nqa tsohle.

Morao kwana ka hara tlhaka, bophelo bo phasaletse hohle tlhakeng. Mme ha bo fihla moduleng, bo bokellana bo patahana haufi ho feta. Empa ha bo fihla lekgapeteleng, bo tlase mme bo tshwana le peo, mme bo ipopa jwaloka peo.

Jesu o re boleletse se tla hlaha tsatsing la qetelo, "Ho bapa ho ka thetsang le bona Bakgethwa hola ke ntho e ka etswang," empa jwale he Peo e tswa mono. Mme lekgapetla, Bophelo bo siya lekgapetla. Mme lekgapetla ke mojari, mme ke hantle feelsa seo phutheho tsa rona tsa bodumedi di bileng sona, mojari; Luther, Wesley, Mapentekosta. Mme jwale ke nako ya ho hlaha ha Peo. Lemohang, lemohang, feelsa...

<sup>99</sup> E ne e se Peo. Maria e ne e se yona. Lekgapetla feelsa, tjellane, le tlhaka, bajari ba karolo ya Lentswe, e seng Lentswe lohle! Luthere o na tshwere tokafatso; Wesley a tshwere kgalaletso; Mapentekosta a tshwere kgutlisetso ya dimeo. Empa ha Lentswe le tla...

Jwale, ba ne ba ka hlahisa hono, hono, tokafatso e tla pholosa motho. Le dumela taba eo? Ehlide, e ne e le mojari wa Lentswe, jwalo feelsa ka ha ke dumela hore tlhaka ke karolo ya koro. Ehlide, ke yona, empa ke mojari. Ha se Bophelo.

Ho nto tla kgalaletso. Ke ba bake ba dumelang kgalaletsong? Le dumela Bibebe, le loketse jwalo. Ehlide. Ka baka leo e sa ntse e se bona; e batla e tshwana le bona haholo; ke mantswe a mabedi ho feta.

Empa yaba ho tla Pentekosta, kgutlisetso ya dimeo. Ho bua ka dipuo, ba re ke pontsho ya mantlha ya Moya o Halalelang. Ho bua ka dipuo, mono, hoo ba ho bitsa pontsho ya matlha, e ileng ya hlahisa (eng?) lekgapetla, empa ba etsa phutheho ya bodumedi.

Empa ha o tla o re, "Nna le Ntate re Bang," le dintho tsena tse ding, eba lekgapetla le ikgula Teng. Empa Kereke ya nneta ya Monyaduwa, ya makgonthe e tla hlahisa Lentswe lohle la Modimo, ka bottlalo ba Lona Sephiring, hoba E sa le yena maobane, kajeno, le ka ho safeleng.

Lemohang, ka hara dipopelo tsa Maria ho no ho e-na le Peo.

<sup>100</sup> Empa ha Peo e ne e hlaha, E itse, "Ke tlil'o etsa thato ya Ya Nthomileng. Nna le Ntate wa Ka re Bang. Ha Ke sa etse

mesebetsi ya Hae, le se dumele ho Nna.” E ne e le Peo eo. “Ke mang ya ka Nqosang ka ho se dumele? Seo Bibele e tshepisitseng hore Ke tla se etsa, Ke se entse. Modimo o netefaditse hono ka Nna,” A rialo. “Ke mang ya ka Mpolellang jwale?” Le a bona?

Empa, pe—Peo ka ho Maria, lekgapetla, e ne e atametse haholo ho ba Hono, empa e ne e se yona. E ne e sa ntse e le ka hara popelo.

<sup>101</sup> Lemohang, le mongwaheng wa Pentekosta. Ho haola le mongwaha wa Luther, ho haola le mongwaha wa Wesley, ebile ntho e tshwanang ho haola le mongwaheng wona wa Pentekosta.

Jwale lemohang. Empa pulong ya Ditiiso tse Supileng, Ditshenolo 10, Lentswe le tletseng le tla tswallwa ponahatsong hape, le ho netefatswa ke Moya wa Modimo, ka matla a phethahetseng a tshwanang le ao Le neng le le oona mohla A ne a le teng lefatsheng mona; ho bonahatswa ka tsela e tshwanang, ho etsa tsona dintho tseo Le di entseng mohla Le ne le le lefatsheng mona. Amen! Baheberu 13:8, e boletse, “Jesu Kreste e sa le yena maobane, kajeno, le ka ho sa feleng.”

Ho Mohalaledi Luka 17:30, Jesu o boletse, “Matsatsing a qetelo, jwalo ka matsatsing a Sodoma, mohla Mora motho a tla Itshenola hape, e tla ba ntho e tshwanang.”

Lefatshe le maemong a Sodoma. Mme kereke e theohetse Sodoma, le lona mmoho, jwalo ka Lota le mosadi wa hae.”

<sup>102</sup> Mme ke re ho na le Kereke e Kgethilweng kaekae lefatsheng lena, e ikgulang mme e beilwe ka thoko dinthong tseo, mme ponahatso ya Modimo e hutse maikutlo a Yona. Re matsatsing a qetelo.

<sup>103</sup> Lekgapetla le neelane ka Matla a lona ka hara Peo. A ile a tswa; e ne e le lekgapetla le letle, empa le sebeditse nako ya lona. Le a bona, ke Lentswe Monyaduwa wa Lentswe Monyadi!

<sup>104</sup> Peo ya nama ya Abrahama, ya Isaaka, le Jakobo, le... Kapa, peo ya nama, ke bolela, ya Ishmaele, peo ya nama ya Isaaka, le jwalojwalo, e ne e loketse ho kena mobung, e tle—e tle hlahise ntho ena e nngwe, ho hlahisa Jesu.

Mme le tse ding tsena di entse jwalo, dipeo di loketse ho omella... Ke bolela, makgapetla a loketse ho omella, modula o loketse ho omella, mme ntho ka nngwe e a omella, e le hore Peo e tle e Itlhahise. Ho bile jwalo mongwaheng o mong le o mong.

<sup>105</sup> Phutheho tsa bodumedi ebile bajari ba karolo ya Lona, karolo eo e leng Lentswe, hoba esale e patetswe bahlabolli ba bohlale, kapa bo...ho kwahellwa bona, ho fihlela mongwaha wa Dintsu o hlahella. Bibele e boletse jwalo. E, monghadi. Hoba, re tshepisitswe hono ho Malakia 4. Hantle, ho jwalo.

“O Le patetse mahlo a ba bohlale le ba masene.”

<sup>106</sup> Jwalo ka ha re sa tswa haola Bukeng ya Ditshenolo, re fumana hore ntho e nngwe le e nngwe, barongwa bao bohle boraro ba bona ba dibata tse ileng tsa tswa; se seng le se seng se ne se tshwanela Luther hantle feela, se seng le se seng se duletse se seng hantle feela, e leng pholo le diphoofolo tse fapaneng tsa Bibebe; di tsstile ka tokafatso, kgalaletso, esita le ho kena ho Mapentekosta. Empa sa bone e ne e le ntsu, ke hantle, mme mongwaheng oo Modimo wa E tsosa. Ka baka leo e ka kgona e fete mongwaheng oo hore e tle e loke, e, monghadi, tshepiso ya ntsu e phethahalang ya—ya Malakia 4.

<sup>107</sup> Jesu e ne e se wa Maria, empa o ttile ka Maria, jwalo kaha Bophelo bo ttile ka lekgapetla.

<sup>108</sup> Jwale, bongata ba lona Makatolike a baena ba batle mona, kapa dikgaitsedi, bosiusg bona, mohlolomong le nahana Maria e ne e le “mma Modimo,” jwalo ka ha le re e ne e le yena. E ne e ka ba mma Modimo jwang, athe Modimo ha o a ka wa ba le qaleho le pheletso ya letho? Le a bona? Ntata Modimo e ne e le mang, he, ha e ne e le mme? Le a bona?

E ne e le mmopi wa hae mosadi, mme yena mosadi e ne e se mmopi wa Hae. O ile a bopa, a Ipopa, ka hara popelo ya Maria, e seng popo ya hae mosadi ka sebele. E ne e le Yena, ya bopileng, Yena. E ne e se wa hae mosadi, empa yena mosadi e ne e le wa Hae. Ke hantle. Bibebe e a re ruta, ho re, “Dintho tsohole di entswe ke Yena,” le a bona, “mme ha ho letho le sa entswang ka ntle ho Yena.” Ka hona O ne a ka kgona jwang... O ne a ka ba le mme jwang, athe E ne e le Modimo ka Sebele?

<sup>109</sup> Jwale mona re bona tshenolo ya nnete ya papiso ya nnete. Basadi ba bararo ba bajari ba peo ya nama ke bao, ho fihlela ba butswetsa ka ho Jesu. Ka mokgwa oo Ishmaele a neng a ke ke a kgona, hoba o tswaletse, hantle-ntle, nthong eo kajeno e nnkuwang, e le ka ntle ho lenyalo, hoba e ne e le mora wa mosadi ya rekilweng. Yaba ho tla ntho e tshwanang le Yena haholwanyane, e kang Jesu, e tswang ho Isaaka; empa e ntse e se yona, hoba e ne e tswetswe ka kopano ya bong pakeng tsa Sara le Abrahama. Empa ha ntano latela Maria, ka tswalo ya morwetsana, a hlahisa Jesu Kreste. Ke hantle. Modimo, Lentswe, le entsweng nama.

<sup>110</sup> Jwale shebang. Ho ne ho e-na le basadi ba bararo. Ho na le basadi ba bararo ba tshwantshitsweng mona, dikereke. Kamehla basadi ba tshwantsha kereke. Ho bolelang, mengwaha e meraro ya diphutheho tsa bodumedi, bajari, ba loketseng ho shwa le ho omella le bona, jwalo feela kaha lekgapetla le tse jwalo di loketse, ho siela Peo sebaka. Peo e ke ke ya loka, e ke ke ya butswa, ke bolela jwalo, pele lekgapetla,

tlhaka, le mahlaku, di omeletse. Ke hantle. E monya Bophelo bo bong le bo bong, bo ho tsona, bohole; amen; sohle seo e bileng sona, ke seo, kopanya le.

<sup>111</sup> Ntho eo e ke ke ya etswa! Jwale ke nako ya Peo, kapa nako ya Monyaduwa. Makgapetla a shwele. Makgapetla a omeletse. Nako ya Lentswe le sa angwang . . . [Sekgeo lebanteng—Mong.] . . . ntle le ho angwa. Ke morwetsana, hopolang, nako ya Lentswe le sa angwang. Ha le ka Le kenya matsohong a phutheho ya bodumedi, ruri E ke ke ya ba morwetsana; Le tla be le se le kile la tshwarwa ke motho, mohla o fihlang ho Lona. Empa Kereke ya Modimo ha e a angwa ke phutheho ya bodumedi. Alleluia! Ke Lentswe la Modimo le bonahatwang le tswetsweng le sa angwa, Jesu Kreste maobane, kajeno, le ka ho sa feleng. Alleluia! Kgele, ho babatseha hakakang! Ke a Le rata. Ke a Le dumela. Kea tseba Ke Nneta. Ha Le ka ke la angwa. Ho ke ke ha ba le matsoho a motho a isang letsoho Tswalong ya borwetsana ya Monyaduwa. Tjhe, monghadi! O a—o laelwa ke Modimo ho tswa dinthong tse jwalo. “Le se ke la ama sesila sa bona, ba fetohile manong.”

<sup>112</sup> Ke hopola feela. Ha ke ne ke tswa Phoenix tsatsi le leng, ke kena Tucson, ke tswa tshebeletsong, Moya wa Modimo o ile wa hapela maikutlo a ka nthong e nngwe; nakong eo nna le mosadi re ntseng re tsamaya, re qoqa, mme bana ba robetse ka mora koloi, ho se ho phirima. Maikutlo a ka a hapelwa ho phakwe, mme ka sheba phakwe eo ho se hokae mme ka e lekodisa. Ke papiso ya kereke hantle kajeno.

<sup>113</sup> Jwale, phakwe, jwalo ka ha re tseba bohole, e lahlehetswe ke boitsebiso ba yona ba tlhaho ya ho qala. Ke hantle haholo. Pele e ne e tshwana le ntsu, moena yona e moholo; eya phakwe. Empa jwale ha e sa fofa dibakeng, ho tsoma manna a yona a lehodimo, empa e se e le bonolo. Ha e sa fofa dibakeng. E qotoma mobung, jwaloka lenong; e dula hodima palo ya mohala; e qotoma jwalo, e tsomana le mebutla e shweleng. Phakwe ha e a etsetswa ho etsa hoo. Tjhe, e etseditswe ho tshwana le ntsu.

Jwale, hoo ho tshwana le kereke. E entswe hore e tshwane ntsu. E loketse ho nka madulo Mahodimong. Empa, ho e-na le hoo, e se e le bonolo. Ha e sa fofela dinthong tse sa tsejweng hape, kwana boputsweng ba lehodimo. Tjhe, monghadi. E itshetlehile mekgweng ya yona ya sejwalejwale, ya peo, ya thuto, le thutabomodimo, phuthehong ya bodumedi e entsweng ke motho; e tsomana le mebutla e shweleng, e seng e batla e putile, eo ntho e nngwe e neng e nkile. Ke hantle. E qotoma fatshe jwalo jwale, le a bona, ke hantle, phakwe. Le a bona, ke yona ntho e bolelang.

Ntsu ha eso fetohle le ha nyenyane. E dula e le ntsu.

<sup>114</sup> Ha e sa fofa hodimo dibakeng, phakwe, ha e sa etsa jwalo, ho tshwara manna a yona a matjha hodimo mono, empa e itshetlehole ho seo e se tholang se se se shwele. Phakwe ha e tsebe mokgwa; ba re e loketse ho dula fatshe. Empa shebang phakwe ya kgale kajeno. Theoha ka tsela, o bona dipalo tsa mohala di tletse diphakwe, ho bona ha eba e ka thola ntho—ntho e bolailweng, ntho e itseng e putileng. E fihlile moo e seng e hloka mapheyo a lekaneng a ho fofa. E...Ntho ya pele le a tseba, e se e tla dula fatshe, ka ho felella, ho thewa fatshe hoba e se e le bonolo. Ha e sa sebedisa matla a yona, hape, ao Modimo a e neileng yona.

<sup>115</sup> Boitsebiso ba yona bo ikgethileng e ne e le ho sesisa dibakeng mme e shebe fatshe ho tswa tlase, empa jwale e dula fatshe mme ha e kgone le ho sheba hodimo. Kelello ya yona e beilwe hodima mebutla e shweleng, ho fumana seo e ka se tholang tseleng; nakedi e itseng, oposamo, kapa ntho e nngwe eo motho a e hatisitseng. Ha se ntsu, empa ke ntho e kang yona.

Jwalo feela ka kereke e itshetlehileng thutong bakeng sa dijo tsa yona le dintho tse jwalo, dijo tsa kamehla tse shweleng kgale dilemo tse fetileng, ka Luther, le Wesley, le Mapentekosta, le tse fetileng, tseo e di jeleng. E shebile morao tumelwaneng e itseng e entsweng ke motho; ho e-na le ho fofa Mahodimong a Lentswe, moo, “Dintho tsohle di ka etsetswang ba dumelang.”

<sup>116</sup> E nkile mekgwa ya letlaka. Dintho tseo tse shweleng di ne di sietswe lenong, lefatshe. Dithuto le dintho tse kang tseo, di sietswe lefatshe, e seng bakeng sa Kereke. E bonolo hoo e sa kgoneng...Ha e sa kgohlahetse. Ha e sa kgonia ho nyolohela Mahodimong a kgohlahetseng, moo, “Dintho tsohle di ka etsetswang ba dumelang.”

E a dula, mme e re, “Tjhe, Ngaka *Sekete-kete* o buile ntho e itseng...Phuthetho ya ka ha e Le dumele jwalo.” Oh, wena phakwe e kgopameng, o tshabang ho phunyeletsa ditshepiso tsa Modimo!

O re, “E, matsatsi a mehlolo a fetile.”

<sup>117</sup> O bonolo. O tshaba ho phuthulla dipheyo tsa hao mme wa fofela kwana. Mme na o se o le bonolo bakeng sa tshebelelso ya thapelo? Na o fihletse sebaka seo o tshabang ho qeta metsotso e leshome aletareng?

<sup>118</sup> Ho qotoma jwalo ka lenong, o ja setopo se putileng mobung! E, monghadi. E bonolo haholo ho mamella mathata a leng teng kwana, hape. E qotoma jwalo ka lenong, mme e ja dijo tsa lenong. Ke seo e leng sona. Ke hantle. Ho fihlela, e se e bile e qadile ho tshwana le lenong. E itshwere jwalo ka lenong. Ha e sa hhole e le phakwe ka letho. E tshwana le lenong ho feta kamoo e leng phakwe. Phakwe e loketse ho fofa; e seng ho dula

hodima palo ya mohala mme e shebane le moutlwa o shweleng, mme e ntano theohela tlase mono mme e tlolela hodimo-le-tlase tseleng jwalo ka lenong. Le a bona?

<sup>119</sup> Eka ntho eo kereke e nang le yona kajeno. “Ho thusang ho nyolohela hodimo Mono le ho fofa hohle, nka nna ka fumana mebutla mona?” Empa e shwele. E bodile. E senyehile. Ka nako e nngwe, e ne e lokile; le thuto ya Luther e ne e le jwalo, Wesley, le Mpentekosta. Hobaneng le e-ja jwalo ka lenong? Manna a matjha a ne a theoha bosiu bo bong le bo bong, mahodimong, bakeng sa bana ba Iseraele ha ba ntse ba tsamaya; ntho efe feela e neng e sala e ne e senyehile. Re ne re ye re re, kwana mahaeng, “e ba le mehatla-e-tsokehang ho yona.” Ho na le mehatla-e-tsokehang e mengata boitsebelong ba rona kajeno, borapedi ba rona bo itshetlehile hodima se boletseng ke motho e mong, seo motho e mong a se boletseng, mme, “Tshepiso e etseditswe mongwaha o mong.”

<sup>120</sup> Ha se kgale ha motho a ne a tla ho nna, moreri wa Baptist, hodimo mono tlung ya ka, mme a re, “O a tseba,” a re, “Ke—ke rata ho o lokisa nthong e nngwe.”

Ka re, “Ke eng?”

A re, “O leka ho ruta Thuto ya boapostola ka kwano mongwaheng wona.” A re, “Mongwaha wa boapostola o fetile.”

<sup>121</sup> Ka re, “Neneng?” Le a bona? “Ke tla o bolella mohla o qalang, mme o mpolelle mohla o no o fela.” Ka re, “Na o dumela Lentswe?”

A re, “Ho jwalo.”

<sup>122</sup> Ka re, “Ho lokile. Jwale, ka Letsatsi la Pentekosta, o dumela ke mohla mongwaha wa boapostola o no o qala?”

A re, “Ho jwalo.”

<sup>123</sup> Ka re, “Jwale he, sebui, Moapostola Petrose, o buile mantswa ana.”

Mme le hopole, Jesu o boletse, “Ya fokotsang Lentswe le le leng Mona, kapa a eketsa lentswe le le leng ho Yona, kabelo ya hae e tla tloswa Bukeng ya Bophelo,” eo ke moreri kapa motho eo lebitso la hae le leng Bukeng.

Ka re, “Petrose o boletse, ‘Bakang, e mong le e mong wa lona, mme le kolobetswe ka Lebitso la Jesu Kreste tshwarelong ya sebe, mme le tla amohela neo ya Moya o Halalelang. Hoba pallo eo e etseditswe lona, le bana ba lona, le ba leng hole kaofela, le bao Morena Modimo wa rona a tla ba bitsa.’ O fedile neng he? Ha e sa le o kene.”

Ke sekgakgatha sa diphakwe tse fetohileng matlaka, mme di qotoma hohle hodima ditopo tse ding tse itseng tse bodileng, tseo mongwaha o mong o ba bolaetsweng tsona. Hantle. E seng Manna a matjha a tswang Mahodimong, hape. Ha ba A batle.

Ha ba... Ha ba kgone ho tshwara tshebeletso ya thapelo. Ha se dintsu, le ho qala; bonolo, ha ba kgohlahala; ba qotoma hohle feela.

<sup>124</sup> Ho jwalo le ka phutheho ya rona ya bodumedi ya sejwalejwale, e itshetlehile thutong, ho thutamodimo ya ho reng e entsweng ke motho, ho hlalosa Dintho tsena tsohle ho di isa hole, mme ba amohela hono. Ha ba nke Lentswe le itseng, "Jesu Kreste yena maobane, kajeno, le ka ho sa feleng." Ha ba batle ho nka Malakia 4. Mme a ke ke a nka ditshepiso tsena tse ding tse buang ka letsatsi lena, le ho bua ka mokgwa wa mongwaha wa kereke. Kamoo moporofeta a itseng, "Lesedi le tla ba teng nakong ya mantsiboya," ha ba nke Sena. Ba batla ho qotoma hohle hodima seo mokgatlo wa Pentekosta o se bolaileng, dilemong tse lekgolo tse fetileng, ho ja manna a batlang a bobile. Ke hantle. Ha a loka ho hang.

<sup>125</sup> Lemohang, kereke e nameng hona, e iphepa ka setopo se bodileng sa lefatshe, dintho tse shweleng tsa lefatshe, jwalo feela ka ha lenong le etsa. Dipolotiki tsa kereke, ha ba dumelle Moya o Halalelang ho romela motho kerekeng; ba loketse ho ba le dipolotiki mme ba bone haeba phutheho ya bodumedi e tla mo amohela kapa tjhe. Ke hantle. Ba jwalo ka lefatshe. Ba apara jwalo ka lefatshe. Ba shebahala jwalo ka lefatshe. Ba itshwara jwaloka lefatshe. Ke manong, jwalo ka lefatshe. Ba botswa, bonolo, baeki. Ke phetho ntho e leng teng mono. [Moena Branham o kokota sefaleng hane—Mong.]

Na o kile wa bona ntsu e qeka? Tjhe, monghadi. Ha ho qeko ka ho yona. Le Mokreste wa makgonthe ha a etse jwalo. Ha a bonolo. O tla tsoma ho fihlela a E fumana. Amen. E, monghadi. O tla fumana Nama ya hae. O batla Manna a matjha. O tla theohela tlase mono mme a tjheke ho fihlela a E fumana. O tla fofela hodimo le hodimo. Ha ho se letho phuleng ena, o tla fofela hodingwana. Ha o nts'o ya hodimo, o kgona ho bona ho feta. Ka hona ke nako ya hore dintsu tsa tsatsi lena di fofele hodimo, ho tjheka ditshepisong tsa Modimo, e seng ho phela ka dijo tsa lenong tse bolailweng dilemo tse fetileng; ho tswa teng.

<sup>126</sup> Dipolotiki, ho voutela ka hare le ho voutela ka ntle, ho bolela sena le *sena, sane*, kapa se *seng*, mme Moya o Halalelang ha o sa na tokelo-ya-tsela ka hara kereke ho hang. Ha ho sa na ditshebeletso tsa thapelo, ha ho sa na tlhokofalo ho Modimo ho phethahatsa Lentswe la Hae! Ha ho sa dumelwa hore Lentswe e sa le lona maobane, kajeno, le ka ho sa feleng! Ba kokobela fatshe ba fetoha manong, ho nka phutheho ya bodumedi, ho ngola lebitso la bona bukeng; mme ba fetohile botswa le bonolo, mme ba dula motsheo mono ba harela setopo sa mofuta o itseng se shweleng ka meharo. Mme, hape, bonyane eka kgona e be phakwe e tshwanang le moena wa yona ntsu, moporofeta ya tlisitseng Lentswe la nnete le ho Le bonahatsa.

<sup>127</sup> Ho itshetleha ho thutabomodimo e seng e batla e bodile, e entsweng ke motho. O e fumana hokae? Pampitshaneng e itseng ya lenaneo le entsweng ke motho la sekolo sa Sontaha, eo morupelli wa horeng a mmolaetseng yona morao kolesheng e itseng, ho mmolella ho re, “Matsatsi a mehlolo a fetile. Ha ho e-so be le ntho e kang kolobetso ya Moya o Halalelang. Hohle Hona ke ho pota.” O batla ho mpolella hore ntsu e ka ja ntho eo? E ne e ke ke ya etsa hono. Tjhe, monghadi.

<sup>128</sup> Le jwalo Mokreste a ke ke a ja ditopong tseo tse shweleng tse tswang dithutong tsa kgale tsa phutheho tsa bodumedi le dinthong. Ba batla Lentswe la Modimo, le letjha, tshepiso ya hora. Modimo o tshepisitse mebutla matsatsing a Luther. Wa tshepisa dintho tse fapaneng matsatsing a ba bang. Empa jwale O re tshepisitse Dijo tse tletseng tse kgutlonne, Selallo se tletseng sa mekgahlelo e supileng, hoba Ditiiso tse Supileng di butswe, mme ntho e nngwe le e nngwe e loketse Lentswe la Modimo, ho bao ba ka amohelang!...?

<sup>129</sup> Diphakwe tse qotomang jwalo ka matlaka. Oh, kgidi! Nahanang ka yona, ho nyatseha ha kakang, kgele—kgele hobaneng hora e le tjee. Jwalo feela ka ha phakwe e lahlehetswe kgale ke boitsebiso ba yona jwalo ka phakwe, le kereke e lahlehetswe kgale ke boitsebiso ba yona jwalo ka moena (nonyana) e monyenyanwa ntsu, baporofeta ba Modimo.

Ka nako e nngwe e ne e le mojari wa lentswe la nnete, tokafatso; ya nto ba mojari wa kgalaletso; ya nto ba mojari wa kolobetso ya Moya o Halalelang, kgutlisetso ya dineo. Empa ha A tswelapele mme a ntse a kgutlela morao, ho leka ho ja ntho e nngwe, manna a tswang tsatsing le leng, a bodile. Ha a loka ka letho.

Ntsu ya makgonthe ya tsatsi lena e a tseba hoo ho no ho itoketse. Empa re na le hoo, kopanya le, ho fihlela Jesu Kreste a bonahatswa bottalang ba Matla a Hae, jwaloka ha A tshepisitse tsatsing lena la getelo.

<sup>130</sup> Jwale ke lekgapetla le omeletseng. Le fetile; Moya wa Modimo o fetile ho lona, ke nnete. Mme e ke ke, e ke ke ya ba mojalefa le Lentswe Peo le netefaditsweng. Ruri e ke ke ya ba jwalo. E ke ke ya kena Tlhwbibilong. E tla ba setho sa kereke, e ka tsoha tsohong ya bobedi, ho ahlolwa ho latela seo e se utlwileng.

Ha o le teng mona bosius bona, mme o le setho sa kereke feela, kahlolo ya hao etlaba efe, mohla bohole re loketseng ho ema mono le ho paka hore o utlwile Nnete? O a bona?

Ha e sa fofela dibakeng tse boputswa ba lehodimo, dinthong tse sa tsejweng, dinthong tse mohlolo, moo Matla le bophahamo, le ditshepiso tsa Lentswe le sa Feleng la Modimo di etswang, “tsohle ho bohole ba dumelang.” A ke ke a dumela

Hono, a rialo. E wela hape morao hantle thapong ya mohala, mme a re, "Phutheho ya ka ya bodumedi e re mebutla e itoketse." Leha e na le dibokwanantsi ho yona, empa, leha ho le jwalo, "E itoketse," le a bona. E itshetlehile nthong eo.

<sup>131</sup> Pentekosta e tshwana le kgait sedi ya yona ya phutheho ya bodumedi ya lenong, e dutseng jwale "ditulong tse kgolo tsa mokgatlo wa bakgopo," ruri, e mametse dihloho tsa yona tsa dipolotiki tsa lefatshe, tse e fepang dijo tsa lenong mebutla e shweleng, tsa ntho e fetileng kwana, dilemo tse mashome a mahlano tse fetileng. Ke maemo a kereke ya Pentekosta. Oho, kgidi!

<sup>132</sup> Jwalo feela ka ha Sara a lekile ho tlisa tshepiso ya dintho tse fetang hlolo ka—ka Agare ya thontsweng ka monwana, ka mokgwa o tshwanang le kereke, e leka ho tlisa tsoseletso. Baevangedi ba rona ba baholo naheng kajeno, "Tsoseletso mehleng ya rona! Tsoseletso mehleng ya rona! Lona Methodise wohle, Mabaptise, Mapentekosta, kopanang bohle mmoho." Le ka ba le tsoseletso ya Manna a matjha jwang nthong ya kgale, e shweleng, ya lenong...?...Le ka e fumana jwang, tsoseletso mehleng ya rona?

Tsoseletso e tla ba nyenyane ha kana ba ke ke ba tseba hore e etsahetse.

<sup>133</sup> Pentekosta e itse, "Oh, ho na le ntho e kgolo e tla etsahala."

E a etsahala, mme ha ba e tsebe. Le a bona, ke moo. Le a bona? E, monghadi. "Hoba moo Setopo se leng teng, dintsu di tla bokana," hantle feela jwalo. Le a bona? Ke seo Le se boletseng. Setopo ke eng? Lentswe. Yena ke Lentswe, Setopo, Kreste! "Kreste o ka ho lona," yena maobane, kajeno, le ka ho sa feleng. Ke nnete E kakang!

<sup>134</sup> Sara, ho leka ho phethahatsa ditshepiso tsohle, le a bona, ka boholo... jwalo ka kereke kajeno, "tsoseletso e kgolo mehleng ya rona," (ka eng?) ka tshepiso e kgopameng. Le tla kgona jwang ho etsa hoo, haele moo Modimo a eso hlohonolofatse mokgatlo?

Le ka mohla ha A eso sebedise mokgatlo. Ha molaetsa o no o tswa, mme ba hlaphisa, o no o shwella mono hantle. Ke qholotsa ranalane e mong le e mong ho mpontsha moo o kileng wa tsoha hape le ka mohla. O ile wa shwella mono wa ba wa dula hona moo. Modimo wa tswa ka hara mojari eo hantle, ho kena ho e mong; ho tswa ho Lutheran hantle, ho kena ho Methodist; ho tswa ho Methodist hantle, ho kena ho maPentekosta; jwale O tswile ho maPentekosta, ho kena Peong.

<sup>135</sup> Hoba, e ka kgona e be Peo. Le ke ke la eta tlhaho ka pele. Ha ho letho, le ka e hlahisang mono ntle le Peo, ka hona Peo e

tla Itlhahisa. E sa le Yena maobane, kajeno, le ka ho sa feleng; yona Topallo ya Mollo, e bontshang mehlolo e tshwanang, Matla a tshwanang, Modimo o tshwanang, meeka e tshwanang, ntho e tshwanang, ho netefatsa Lentswe le Bibele, hantle feela. E sa le Yena maobane, kajeno, le ka ho sa feleng. O etella pele, bosiusg bona. Modimo o re thuse ho E bona le ho dumela ho Yona! Ehlide!

<sup>136</sup> Le a bona, Sara, kereke, Agare ya thontsweng. Ha e a ka ya sebetsa. E sebeditse na? Tjhe. Sehlopha sa hae se thontsweng se ke ke sa sebetsa kajeno, le hona. Dingaka, le diPh.D., le diL.L.D., ha di sebetse hona. Bajari bohole ba hloleha.

Luther o ile a hloleha, jwalo ka Agare a entse. Agare o ile a etsa eng? A bea mora wa hae sefubeng sa mosadi e mong (ho jwalo?), ho hodisa ngwana hae. Agare o entse hono; a bea mora wa hae, mora wa hae ya inotshi, sefubang sa mosadi e mong (e seng mmae), ho mo hodisa. Ke yona ntho eo Luther a e entseng ha a na a bea mora wa hae, tokafatso, phuthehong ya bodumedi kwana ho tshwenyana le yena, ke hantle haholo, ho mo hodisa.

<sup>137</sup> Wesele e hlolehile ka moo Sara a hlolehileng kateng, ka ho belaela hore Tswalo e mohlolo ke kolobetso ya Moya o Halalelang, jwalo ka ha Sara a entse sefateng sa eike. Ha Wesley a na a hlahisetswa ntho e mohlolo, mohla mongwaha wa Pentekosta o no o fihla mme le Wesley a tsebiswa ho buwa ka dipuo le Ntho ena yohle, ba ile ba tsheha mme ba E soma. Lona bohole kereke ya Kreste, le lona, ho thweng le bona, le lona Baptists, le Presberians, e mong le e mong wa lona, la pena dinko tsa lona, ho Yona, la tloha ho Yona. Hantle. Le ile la etsa'ng, Wesley? Le ile ra rekisetra mokgatlo ngwana lona, mme a shwa a ba a timela. Ke hantle haholo.

<sup>138</sup> Empa, Lentswe, Lentswe la nneta la nna la tswela pele hantle. Ha le a ka la dula mokgatlong oo. La tsamaya ho kena ho pentekosta hantle, mme la feta la nka bo bong hape. E ne e le Mora ya hodileng ho feta, jwalo ka Peo e wetseng popelong; mme, ka mora nakwana, La qalella lesapong la mokokotlo, ya nto ba ho fumana matshwafo, le ho ba le hlolo le maoto.

Mme, ka mora nakwana, La fihla moo Le tswalwang teng. Ke hantle. Ka baka leo, ke ka moo Kereke e hotseng, ka mokgwa o tshwanang.

<sup>139</sup> Wesley o belaetse jwalo ka ha Sara a entse sefateng. O ile a re... Mohla Lengeloi la Morena, monna, ya apereng jwalo ka... Kapa, Lengeloi, Modimo, e ne e le yena, ka Sebele. Elohim, ya apereng jwalo ka motho, a eme mono ka lerole diaparong tsa Hae, mme a bolela hore O fane ka tshepiso; hoba Sara a be mashome a robong a dilemo, mme Abrahama a le lekgolo.

Mme Sara a itshehela, mme a re, "Ho ka ba jwalo jwang, ha e le moo nna le Abrahama re eso be, tjhe, ha re eso kgone ho

tloha re sa le batho ba batjha, kamano ya lelapa, mohlolomong ka dilemo tse mashome a mabedi.” A ka ba lekgolo la dilemo. A re, “Nna, na nka boela ka thaba le morena wa ka, ke tsofetse, le yena o tsofetse, hape? Mme mophula wa hae wa bophelo o se o shwele, mme popelo ya ka e omeletse. Matswele a ka a fedile; methapo ya lebesse e fedile. Nka le fumana jwang?”

<sup>140</sup> Modimo wa re, “Ke le tshepisitse. O tla tla, leha ho le jwang!”

<sup>141</sup> Le Wesley o entse jwalo. “Re ka ba amohela jwang ha ba bua ka dipuo, le phodiso ya Kgalalelo, le dintho. Ha di a etsetswa rona tsatsing lena.”

<sup>142</sup> Modimo wa re, “Ke tshepisitse, ‘Matsatsing a qetelo Ke tla tshela nama yohle ka Moya wa Ka.’” O tshepisitse ho e etsa, mme A tswela pele ho e etsa, le hona. [Sekgeo lebanteng—Mong.] Mme kereke ya Wesley, ka modula wohle wa yona wa dikgaitsedi, wa Baptists, Presbyterians, le kereke ya Kreste, le Nazarene, Pilgrim Holiness, le United Brethren, le ntho tsa pele, di shwele le yona. Mme Kereke ya nna ya tswela pele.

Jwale Pentekosta e ile ya etsa’ng? E a itlhophisa, jwalo feela ka lekgapetla. E entse ntho e tshwanang. E ile ya itlhophisa hantle mmoho, ya ipea jwalo ka lekgapetla. Ke hantle.

<sup>143</sup> Pentekosta e bile jwalo ka Maria. [Sekgeo lebanteng—Mong.] . . . mokete wa pentekosta, bonang seo Maria a se entseng. Maria a ets’ang se phoso? Moketeng wa pentekosta, ka nako e nngwe, a kopana le ba batho ba boholong, baprista. Mohla, Mora wa hae, a sa Mo fumane kae kapa kae. Mme yaba o a kgutla, leeto la matsatsi a mararo.

O ne a Mo siile. Jwale ka kereke ya mehla ena kajeno, makgetlo a ka bang mararo, kapa mashome a mabedi a metso e mehlano, kereke e siile, dilemo tse ka bang mashome a mahlano tse fetileng, kapa mashome a supileng le metso e mehlano.

<sup>144</sup> A Mo siya moketeng wa pentekosta. Maria a kgutla le Josefa hape, matsatsi a mararo, ho batlana le Yena. A ntse a Mmatla; a sa Mo fumane.

A Mo fumana. A fihlela eng? A Mo fumana ka tempeleng a botsana Lentswe la Modimo le baprista. Mme ka pela baprista bao hantle, baholo bao, Maria a kenya metsi ka moedi. A etsa ntho eo a na a sa lokela ho e etsa hantle.

Le mmitsa, “Modimo; mma Modimo”? Mme e ka kgona a be le bohlale bo fetang ba mora wa hae.

Mme a re, “Nna le ntatao e sa le re o batla ka dikgapa, motsheare le bosiu.” Hee! “Nna le ntatao,” a bolela ha tswalo e ne e se mohlolo, hore Josefa e ne e le ntata Jesu. A latola tswalo e fetang tlholeho.

Pentekosta e ile ya nka ho bua ka dipuo. Ba latola Tswalo ya Lentswe. Ke seo e se entseng hantle. E tla nka ho ho kana ho Lona, empa e seng ho nka hohle ho Lona. E latotse Tswalo ya Lentswe, jwalo ka ha Maria a entse. Empa, elang hloko, ho ke se hlole ho e-ba le mekgatlo e meng ka morao ho ntho Ena.

<sup>145</sup> Hlokamelang Lentswe ka boLona, leha, le le dilemo tse leshome le metso mmedi, nthwana e nyenyane morao kwana ka hara lekgapetla, A re, “Na ha le tsebe e ka kgona Ke be mosebetsing wa Ntate wa Ka na?” Lentswe la lokisa kereke, hantle hona moo.

<sup>146</sup> “Dintho tsee tsohle o di etsetsa’ng? O a tseba o ka se etse hona. Re tla kwala menyako ya rona; re ke ke ra o dumella ho kena.”

<sup>147</sup> “Hoba na ha le tsebe Ke tshwanetse ho ba mosebetsing wa Ntate wa Ka?” Le a bona? Ehlide, ehlide, mohlolo wa nnete!

<sup>148</sup> Ka ho kgahlwa, a bolela ha E ne e le mora wa Josefa feela, monna ya tlwaelihileng feela. Kapa, seo Pentekosta e se entseng, a bolela ha E le “e mong wa ba bararo.” Shuu! Ke a tseba hoo ho a thonkga, “e mong wa ba bararo.” Empa E ne e le boraro boo bohle, ho a le Mong. Empa Pentekosta, “Oh, e, Ke Mora wa Ntate, wa Moya o Halalelang, e ntano ba . . .” Oh, kgidi!

Empa Lentswe la nnete, la sebele la bua hantle, mme la re, “Ha ho ba bararo ba bona. Ho na le a le mong wa bona.” [Sekgeo lebanteng—Mong.] Amen. Ha le tsebe Lentswe la Modimo? Le se etse ba bararo ba bona; empa a le Mong.

<sup>149</sup> Lemohang, ha ho sa tla ba le bajari, dikereke tsa bomme, phutheho tsa bodumedi, ka mora pelesa ena ya lekgapetla.

<sup>150</sup> Hobane, ka mora lekgapetla, ha ho sa na letho, ha ho letho le salang lekgatheng leo ntle le Thollo. Na ho jwalo? E loketse ho ba Thollo. E loketse ho ba mofuta o tshwanang le o keneng mobung, Jesu Kreste maobane, kajeno, le ka ho sa feleng, Moya o thehelang hodima Monyaduwa ho etsa dintho tse tshwanang le tseo A di entseng. Le a bona? Ke tlhahiso e ntjha ya Thollo hape.

<sup>151</sup> Lentswe, le bonyenyaneng, la Ipuella, “Mme ha le tsebe Ke tshwanetse ho ba mosebetsing wa Ntate wa Ka na?” Hee!

<sup>152</sup> Ke seo sephiri sa Molaetsa jwale, hantle feela, “mosebetsi wa Ntate.” Mosebetsi wa Ntate ke eng?

Le ka nahana mosebetsi wa Ntate e ne e le ofe, ka ho Yena? Ho tlatsa seo Esaia a se boletseng, “Morwetsana o tla emola.” Ho tlatsa seo Esaia, a se boletseng hape, “Diritsa di tla thala

jwalo ka kgama,” le ntho tseña tsohle tse tla etsahala. Jwalo ka ha Moshe a boletse, “Morena Modimo wa lona o tla hlahisa Moporofeta, hara lona, ya jwalo ka nna.” E ne e le mosebetsi wa Ntate, ho tlatsa Lentswe leo.

Tjhe, ha ntho eo e fetile ka hara ditlhaka tseo, tsa basadi bao ba nama; ho ka thweng ka ditlhaka tseña tsa ba moyá, basadi ba kereke? Dikereke di bua ka basadi, *basadi* ba bolela “dikereke,” ke rialo. Na ho jwalo?

Ebe ke eng hona jwale? “Re tshwanetse ho ba mosebestsing wa Ntate,” Koro e tla hweletsa e arabela, Thollo. E, monghadi. E tshwanetse ho etsa’ng? Ho netefatsa Malakia 4, ho netefatsa Luka 17:30, ho netefatsa Baheberu 13:8, ho netefatsa Mohalaledi Johanne 14:12, ho netefatsa Lentswe la Hae lohle. Ho netefatsa Baheberu, ke bolela... Ditshenolo, kgaolo ya 10, ya pulo ya Ditiiso tse Supileng, le diphiri tsa Modimo; esita le ho fihla ho peo ya noha, le tsohle, di ne di tla bonahatswa; lenyalo le hlalo le diphiri tseña tse ding tsohle tseo e sa le di patwa tlasa ditshiya dilemong tseña tsohle, ho tswa baithuting le ba jwalo, empa jwale ke hora. Ke mosebetsi wa Ntate oo.

Le nahana ba ka Le amohela? Ba batla ho ba maemong, mme ba re, “Phutheho ya rona ya bodumedi ha e re rute Hono.” Empa Bibele e etsa jwalo. Ke hantle.

<sup>153</sup> Modimo o Le paka e le nnete. Ehlide, Le tlatsa mongwaha wona, mohla Ditiiso tse Supileng. Kapa, ho paka feela hore phutheho tsa bodumedi e ne e le bajari, ke o mong wa mesebetsi ya Ntate, ho kgodisa. Mme mosebetsi wa Ntate jwale ke ho le bontsha hore phutheho tseo tsa bodumedi ha se tsa Hae. Ke ditsamaiso tse entsweng ke batho tse latolang Lentswe. Hantle. Lemohang.

Le ka re, “Tjhe, Maria, morwe... morwetsana e moholo!”

<sup>154</sup> Sefapanong, ha A ka a mo bitsa, “mme.” O ile a mmitsa, “mosadi,” mojari, e seng mme. Le a bona? Ka sebele, e ne e le mojari wa Lentswe, empa e ne e se Lentswe. Yena e ne e le Lentswe. Oh, e.

<sup>155</sup> Lemohang, hape, ha a ka a etswa setlama se le seng le Yena tsohong. O ile a shwa a ba a tsoha, hoba E ne e le Lentswe. E ne e mpa e le mojari feela. O ile a shwa, mme le jwale o sa le lebitleng. Ke hantle. Ka baka leo, e mpa e le mojari feela, e seng mme wa Hae, e seng Modimo. E ne e le mojari jwalo feela kamoo dikereke di leng kateng. Ke hantle. Ho a bontsha hore e ne e le mojari feela, e seng Lentswe.

<sup>156</sup> A re kwaleng ka ho bolela ntho ena. Oh, diphakwe tsa Pentekosta, tse qotomang hohle jwalo ka manong, tse sikarang joko le lefatshe jwalo ka ha ba bang bohole ba etsa, “ba nang le sebopoho sa borapedi, ho ka thetsang le bona Bakgethwa hola ho ka etswa, empa e le ba latolang Matla a jona,” jwalo ka ha

moporofeta a bolela mona. Mohlala o phethahetseng wa seo Lentswe la Modimo le boletseng hore e tla ba sona matsatsing a qetelo, mongwaha wa kereke ya Laodisea, “feela, sefofu, madimabe, mofutsana, soto, mme o sa e tsebe; o ipolela hore o moholo o ruile, ‘ha o hloke letho.’” Athe ha o tsebe o fetohile ho tloha ho phakwe, moena ya kang moporofeta, ho boloka Lentswe la Modimo le tsepame; o fetohile lenong, mme o fepa batho ba wona ka mebutla e shweleng ya bokereke. Hantle haholo. Tsohang! Kgele, le lebeletse ho bonahatswa jwang, kapa ho ba majalefa le dintsu, hodima dintho tse kang tseo horeng e kgolo ena nakong eo Tlhwbilo e leng haufi.

<sup>157</sup> Oh, Bakreste, oh, modumedi, ha eba o no o ntso o le modumedi ya sekgeeqe, dula o ntso o etela dikopano ho se hokae feela (o tla etsa jwalo?), re na le ntho e nngwe mona eo ke dumelang hore Morena o batla le e tsebe.

Nako e ile; nke ka tswela pele. Ke loketse ho kwala, mme mohlomong ke qetelle hosane bosiu. Empa, bonang, a re inamiseng dihloho tsa rona motsotsotso feela.

<sup>158</sup> Ha ke batle ha le ka ela grama eo ke e sebedisang hloko, empa ke batla le mamele motsotsotso feela seo ke le boleletseng sona. E hlakile hoo le ka e utlwisisang, ke a kgolwa, ha le lakatsa jwalo. Ha o le teng bosiusing bona, mme o se na boiphihlelo bona....

Ha ke bolele... O re, “Ke hobetse Moyeng, ka tlola hohle.” Eya, diphakwe di etsa yona ntho eo, jwalo feela ka makgwaba le manong. Ha ke kope seo.

O ja eng? O fumana dijo tsa hao tsa kamehla kae? O iphepha ka eng, ka Lentswe la Modimo kapa setopo se itseng sa kgale se bodileng se sebedisitsweng morao kwana, dilemolemong tse fetileng? Na boiphihlelo ba hao, esita le bosiusing bona, ka ntho eo o e thonakileng dilemeng tse ngata tse fetileng; kapa na bo botjha mme bo ntjhafetse bosiusing bona, Manna a matjha a sa tswa theoha Lehodimong, mme o fepa moywa hao ka Wona, o shebeletse ntho e nngwe e lokileng le e molemo hosane? Ha o se jwalo, jwale ka dihlooho tsa lona tse inamisitsweng le mahlo a lona a kwetsweng, le ka dipelo tsa lona tse inamisitsweng, ipotseng potso ena e mahlonoko. Mme e seng ho nna, empa ho Modimo, na o ka phahamisa letsoho la hao e le bopaki, ba ho bolela ntho ena, “Modimo, lokisa soule ya ka le moywa hao ka, ke tle ke iphepe ka Lentswe la Modimo feela.” Na o ka phahamisa letsoho la hao, o re... Modimo a o hlohonolofatse. Modimo a o hlohonolofatse.

<sup>159</sup> Ha ke tsebe hantle feela ke ba bakae ba ka mona, ba leng teng, bosiusing bona. Ke mmadi ya fokolang wa letshwele, empa nka re bonyane karolo ya boraro, kapa ho feta, e phahamisitse matsoho a yona, hore ba batla maya e beilweng maemong. A re hopoleng thapelong jwale re sa inamisa dihlooho tsa rona.

<sup>160</sup> Modimo o ratehang, ke jere boikarabelo ba ho bolela Lentswe feela. Mme ka ditshwantsho tse nyatsehang tsena tse nyenyane, dipapiso tse nyenyane, batho ba bona hore e mong e ke se be mojalefa mmoho le e mong. Mme re a tseba matsatsing a qetelo ho tla ba le batho ba tla hlwibilelwa Mahodimong, mme ba bang ba bona ba tla ba mona mohla Jesu a tlang. Mme re Mo shebeletse ho tla esita le bosiu bona.

<sup>161</sup> Mme ke nahana ka dilemo tse mashome a mararo, mohlomong mashome a mararo kapa mashome a mararo le metso e meraro tse fetileng, ke kgumame mona mohlomong nakong yona ena ya bosiu, ho ella ho mashome a mararo ka morao ho robong kapa hora ya leshome, ke rapella ntate ya neng a lahlehile. Bosiung bona, Morena, ke rapella bontate ba bangata, bomme ba bangata, le baena le dikgaitsedi. Na O ke ke wa ba le mohau, Modimo o Ratehang? Nako ya hore ntate wa ka a etse letho ka hona e fetile; o fetetse ka mose wane ho meedi ya bophelo bona. Mme kapele, Morena, re se re tla fetela nqeng eo bohle. Le nna, hape, ke tshwanetse ho nka tsela eo. Monna e mong le e mong le mosadi, moshanyana kapa ngwanana, ka mona, o loketse ho nka tsela eo. Mme re tla jara boikarabelo ka seo re se etsang ka Lentswe la Modimo.

<sup>162</sup> Monna eo o ile shebahala e le nthwana e kakang, ka pela sefahleho sa Davida, mohla a mo tshwelang! Batho bao ba tla nahana ha nyenyane hakakang, ba neng ba tshwela Jesu Lentswe, mohla A kgutlang hape, le ba Mo hlabileng. Batho bao ba tla ikutlwa ba nyenyefetse hakakang ba neng ba ka tloha mona mme ba bona esita le...e seng le ka mantswe a maholo a seGerike, le dintho tse jwalo, empa ka tlhaho e totobetseng e re rutang Modimo mmopi; re kgona ho bona bajari ba Lentswe, le ho bona Lentswe ka boLona, le ho tseba hora eo re phelang ho yona, mme nako ya kotulo e fihfile mona.

<sup>163</sup> Modimo o Ratehang, re se Le nee mekokotlo ya rona, bakeng sa bowatla bo itseng ba lefatshe, empa re Mo amohele ka dipelo tsa rona tsohle bosiu bona. Morena, bopa ka ho nna moyo o lokileng, Moya wa Bophelo, ke tle ke dumele Mantswe wohle a Hao, le ho amohela Jesu Lentswe, yena maobane, kajeno, le ka ho sa feleng, le ho dumela kajeno karolo e abetsweng mongwaha wona. Fana ka sena, Morena. Ke kopa hono ka Lebitso la Jesu.

<sup>164</sup> Mme jwale ke tla kopa e mong le e mong wa lona, le sa le mona mme le sa nahana ka ntho ena, ka ho shwelella ruri. Ha re na kereke eo le ka ngodisang ho yona. Re na le letsha tlase mono ho kolobetsa ho lona, "Ba dumelang ba ne ba kolobetswa," ha o eso kolobetswe ka kolobetso ya Bokreste le jwale. Hoo ha ho bolele hofafatswa, ho horometsa; ho bolela ho qwediswa. Eseng ka ditlotla tsa Ntate, Mora, Moya o Halalelang, empa ka Lebitso la "Jesu Kreste," jwalo ka ha kereke yohle e kolobeditswe, ho fihlela kereke ya Katolokie ka

303 e kenya medimo e meraro le ditshobotsi tse tharo tsa kolobetsso, ka ditlotla tse borarong. Ha o e-so fumane hoo le jwale, hosane hoseng ka hora ya leshome ho na le diaparo le dintho tse le emetseng tlase mono.

<sup>165</sup> Na le ke ke la tla mme la kopana le Jesu Kreste, e seng le rona. Ha re na kereke esita le mona ho le baballa. Eya kerekeng efe kapa efe eo o e ratang, hohle moo o tswang teng, empa, ka kopo hle, dumela Lentswe lena. Le a e dumela? E reng, “Amen.” [Phutheho, “Amen.”—Mong.] Modimo o le hlohonolofatse. Le ke le etse . . .

<sup>166</sup> Ha ho e-na le ntho eo re ka kgonang ho le thusa ka yona, re mona ho etsa jwalo.

<sup>167</sup> Jwale, kea tseba ho na le ba kulang mona. Nako ya rona e re siile, bosiung bona, bakeng sa mola wa ho rapellwa. Mohlomong re tla e fihlela, leha ho le jwalo. Ke batla e mong le e mong wa lona a nkeketsi ho hong. O dutse haufi le motho; bea matsoho a hao hodima motho eo.

Mme ha ho pelaelo o beile matsoho a hao hodima ntsu, mohlomong ntsu e neng e ntse e-ja dijo tse itseng tsa lenong sebakeng se seng; ya kudiswa ke tsona. Ha ba sa di batla. Ba batla ho tswa teng. Ba kula ba kgathetse ke tsona. Ba dutse mona bosiung bona mme ba bona seo dintsu di ka se jang ruri, Lentswe, le ho ba le Kreste ya phelang ya phelang hara bona, a Ipontsha a phela, yena maobane, kajeno, le ka ho sa feleng. Ha ba batle ho ba majalefa hammoho le makgapetla; a se a tla tjheswa. Setoroi sohle le dintho tse jwalo di tla tjheswa. Motjhini o kotulang o a tla ho phophotha Koro ho e ntsha. O batla ho ba Koro.

<sup>168</sup> Ho na le ba bang ba bona ba kulang, ba bang ba bona ba kula nameng. Ke batla hore o rapele, ntsu. Rapella moena'o, kgaitsemi ntsu mono, ke sa le rapella mona. Moya wa Modimo o ke o theohele hodima lona.

<sup>169</sup> Hopolang, ke le fa Dijo tsa ntsu, tshepiso ya Modimo. O bitsa baporofeta ba Wona, “dintsu.” Yena o Ipitsa Ntsu, Yena ke Jehova Ntsu. Mme le sa beane matsoho hodimo, ba rapelleng.

<sup>170</sup> Ntata rona ya Lehodimong, Lentswe la Hao le boletse, thomo ya ho qetela O e fileng Kereke ya Hao, e ne e le, “Eyang ke hona ka lefatshe lohle, mme le bolele Evangedi,” ditaelo tse akaretsang, “ya dumelang mme a kolobetswa o tla bolokeha; ya sa dumeleng o tla ahlolwa. Mehlolo e tla tsamaya le ba dumelang ke yona ena; ka Lebitso la Ka ba tla leleka matemona; ba tla bua dipuo tse ntjha; ha ba ka nwa ntho e bolayang, e ke ke ya ba ntsha kotsi; ha ba tshwara dinoha, di ke ke tsa ba lematsa; mme ha ba bea matsoho hodima ba kulang, ba tla fola.”

O Jehova Ntsu, fepa bana ba Hao bosium bona ka Lentswe leo, Morena. Ba hloka. Ke dijo tsa kamehla tseo ba di hlokang. Ke seo ba se hlokang, ho tseba hore Dijo ke eng, hore HO RIALO MORENA ke eng.

<sup>171</sup> O tshepisitse, hore ha ba beana matsoho hodimo, ba tla fola. O Morena Modimo, tlosa dipelaelo tsohle le menahano ya manong ho rona jwale. Mme re je Dijo tsa Ntsu ka ho shwelella, tsa Lentswe la Modimo.

<sup>172</sup> Moya o mong le o mong o sa hlwekang o ka hara batho bana, moya ka mong wa pelaelo, moya ka mong wa tshabo, kgomarelo ka nngwe ya phutheho ya bodumedi, tlwaelo ka nngwe, bolwetse ka bong, lefu ka leng le hara batho, le tsamaye. Ka Lebitso la Jesu Kreste, le ke le tswe sehlopheng sena sa batho. Mme ba ke ba lokolohe ho qala horen ena ho ya pele, ba tle ba kgone ho ja Dijo tsa Ntsu tseo re dumelang hore O tla re tlisetsa tsona vekeng, Morena, ho bula Ditiiso tseo le ho re bontsha diphiri tse sa le di patwa ho tloha motheong wa lefatshe, jwalo ka ha O tshepisitse. Ke ba Hao, Ntate. Ka Lebitso la Jesu Kreste. Amen.

<sup>173</sup> Bohle ba dumelang le ba amohelang, emang ka maoto a lona, le re, “Ke a dumela. Ke a amohela. Seo Modimo a ntshepisitseng sona, ke a se amohela.” [Phutheho e ema ka lentswe la kamohelo—Mong.]

Morena a le hlohonolofatse. Ho a babatseha. Motho e mong le e mong o eme! Ho hotle.

Lehlaso, *Ke A Mo Rata*. A re Mmineleng thoko ena ka hona, “Ke a Mo rata, Ke a Mo rata hoba A nthatile pele.” Mmoho jwale.

Ke a Mo rata, (ha o etsa, a re pha'miseng  
matsoho a rona) Ke a Mo rata  
Hoba A nthatile pele  
O lefeletse pholoso ya ka  
Fateng sa Golgotha.

<sup>174</sup> Oh, ha A babatsehe na? [Phutheho e re, “Amen.”—Mong.] A re tsukutlaneng ka matsoho. Moena, ntsu, reteleha feela, kgaitsemi, tsukutlanang ka matsoho, re sa e bina.

Ke a Mo rata...

Moena, ntsu! Moena, ntsu! Moena, ntsu, ya rerang Lentswe! Charlie, o phela jwang? Modimo a o hlohonolofatse, moena. Ke thabo ho o bona! Modimo a o hlohonolofatse, moena. Modimo a o hlohonolofatse, moena, ntsu. Modimo a o hlohonolofatse.

Fateng sa Golgotha.

A re phahamisetseng matsoho a rona ho Yena hape.

Ke a Mo rata, ke a Mo rata  
 Hoba A nthatile... (mme A o etsa, ntsu)  
 O lefeletse pholoso ya ka  
 Fateng sa Golgotha.

<sup>175</sup> Le tla tseba jwang, lefatshe le tla tseba jwang hore le rata Jesu? Ha re ratana. Ke kamoo lefatshe... Le a bona, Modimo o bona tumelo ya hao; lefatshe le bona ketso tsa lona. Le ratane jwale. Ebang mosa ho e mong le e mong. Le buisane. Le mamellane.

Mme dikeletso tse ding tseo re ka di ntshang, kolobetso, ho batla Moya o Halalelang... Ha re na sebaka sa ho etsa hoo mona, le a utlwisia. Memo ya aletare, ha Modimo a o kgodisitse hore Hona ho lokile, hore Jesu Kreste e sa le yena maobane, kajeno, le ka ho sa feleng, mme o batla ho kopana le Yena mmoho, eya o kolobetswe ka Lebitso la Hae, hosane. Ho tla ba le batho ba le rutang mono. Ntho efe eo re ka e etsang ho le thusa, re tla e etsa.

Ke a Mo rata, ke a Mo rata

Lona ba mehaleng jwale, Tucson, kwana California, hole Botjhabela, phahamisang matsoho a lona, ntle kwana mono...?... Le Mo rorise!

Lefeletse pholoso ya ka

Ke mang ya tla qhalanya batho? [Moena Branham o buisana le motho e mong kalaneng—Mong.] Jwale, ho fihlela hosane bosiu, ke le fa Moena Neville, modisa wa rona.



*Peo Ha Se Mojalefa Hammoho Le Lekgapetla, Vol. 6 No. 8  
 (The Seed Is Not Heir With The Shuck, Vol. 6 No. 4r)*

Molaetsa wona o tliling ka Moena William Marrion Branham, o rerilweng tshimolohong ka Senyesemane ka Labone mantsiboya, Hlakola, 18, 1965 odotoriamong ya Sekolo sa Parkview Junior High, mane Jeffersonville, Indiana, U.S.A., o ntshitswe mabanteng a kgatiso a makenete mme o ngotswe o sa kgutsufatswa ka Senyesemane. Phetolelo ena ya Sesotho sa Borwa e phatlaladitswe ka 1998 ke ba ha:

VOICE OF GOD RECORDINGS  
 P.O. Box 950, Jeffersonville, Indiana 47131 U.S.A.

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)